



廣州府志

ル 5
1212
45



廣西通志

卷十四

1212
407



廣州府志卷一百二十五

列傳十四

明

從化

龍門

增城

歐陽寅

余用訥

黎貫

父元昌

梁宸

黎民憲

李曰芳

麥春芳

趙鶴隨

李桓

黎民表

弟民衷
邦炎

民襄

子

李師周

李佐

黃鍾

鄧士昌

鄧文炳

從弟文燦

黃應中

鄧良佐

歐陽潢

鄧正吉

譚煒

李粹中

歐陽暉

戴琳 戴瓊

許瑛琪

李相

子承銘 承綜 以上從化

姪孫維

李元厚

劉獻

兄霑霖 黃茂光

翟子奇

廖翰標

廖大科

郭用賓

譚學元

蘇韶

廖吉人

以上龍門

湛懷德

陳仲光

賴麒興

張度

陳敬

張迪

湛若水

子東之

孫恭先

林暕

尹鳳

吳澹

李聰

胡璋

姚珩

盧綸

孫應科 應徵

曾孫偉

湯文經

林允

兄元 從子良

陳廷璉

謝禧

張潮

黎鈺

單雍

黃衮

子夢說

黎皓

伍閻

胡庭蘭

祖暉

劉維嵩

黎派

兄朝勳

陳經翰

盧崇勳

曾受益

吳綱

潘禹謨

王三奇

何天球

子鼎鉉

何日瀾

蔣亞奴

劉若鱗

以上增城

明

歐陽寅字敬之從化人少敦樸力學鄉里稱其篤行領天順六年壬午鄉薦為鬱林知州重學校寬徭役成化十七年征撫康十九年征陸川俱有功九年考滿士民保留僉事曾驥以其績上詔加俸復任三年擢南甯府同知先是同邑余用訥亦知是州行政公平視民如子時大水擁沙田地荒蕪具奏准停徵米五千餘民樂復業後擢潯州知府進階三品及寅政尤著鬱林人祀之名宦祠居南甯未久即告歸據黃通志修

黎貫字一卿父元昌字德隆生五齡而孤先世經元之亂墳墓有失所者輒號哭問人竟得之志石存焉里中豪侵其業人勸訟之曰彼致富類是多矣吾訟之則人皆訟之其家必因吾而破聞者歎服晚年尤嗜書鄉黨稱翠峰先生泰和歐

陽鐸督學嶺南聞其賢為之作傳焉貫器局凝重十六補縣學生領正德二年丁卯鄉薦六年辛未中乙榜授建平教諭請監司禁溺女新文廟及名宦祠祀吳應龍黃巖御史張仲賢薦于朝以備風憲正德十二年丁丑進士改庶吉士作大禮慶成賦為時所稱授陝西道御史首言京師火甲之弊刷卷福建奉命清軍劾鎮守內官尙春侵官帑悉追還之時太監同藩司乾沒官銀萬兩托人祈免貫按劾之還官銀十二萬糧二十六萬又請表勵孫燧等忠節裒錄先發宸濠鄭岳等三臣上皆從之世宗入繼時流賊起山東請設總制大臣理軍事又請兩廣行鷗剿之法請復起居注之制命詞臣編類章奏備纂述從之登極詔書禁四方貢獻後鎮守中貴貢如故上言陛下明詔甫頒而諸內臣曲說營私希恩固寵其

假朝命以徵取者謂之額而自挾以獻者謂之額外罔虐百姓致朝廷之澤壅而不流非所以昭大信彰君德也時廷議欲以戚畹奉安陸陵祀貫以爲不可上疏論之且曰陛下不早抑之恐他日驕恣如薄昭王鳳然後圖之亦已晚矣嘉靖二年帝從玉田伯蔣輪請于承天立興獻帝家廟以輪子榮奉祀貫言陛下信一謬臣之說委祀事于外戚神不歆非類獻帝必將吐之不聽尋疏言國初夏秋二稅麥四百七十一萬而今損九萬米二千四百七十三萬而今損二百五十萬以歲入則日減以歲出則日增乞敕所司通稽祖宗以來賦額及今日經費之數列籍上聞帝嘉納焉出按江西首罷浮橋之害商旅便之辨諸冤獄皆得其情宸濠之變株連甚眾貫治其從逆數人餘悉宥父喪歸久之起故官會帝從張孚

敬議去孔子王號改稱先師竝損籩豆佾舞之數編修徐階以諫謫御製改正祀典說頒示廷臣而孚敬復爲祀典或問以希合帝意議已定貫率同官合疏爭之帝震怒曰貫等謂朕已尊皇考爲皇帝孔子豈反不可稱王奸逆甚矣其悉下法司按治于是都御史汪鏊言比者言官論事每挾眾以凌人曰此天下公議也不知倡之者止一人請究倡議之人明正其罪帝然之已而刑部尙書許讚等上其獄當贖杖還職帝特命褫貫爲民後撫按科道保薦之疏十三上以鄉人處要地忌之竟不得起久之卒于家著有臺中藁使聞藁西巡

藁共十二卷文集六卷

據從化志黃通志郭通志明史本傳修

梁宸字景辰號賓月馬村影田人進番庠親老棄去宏治十七年甲子抵省遂儒士中高魁正德辛未會試副榜授定遠

教諭師嚴道尊世宗仰之陞衡山令善政德民及解印歸士民誌去思泣送百里及卒友人御史黎貫表其墓據從化志修

黎民憲字惟鑒水東人貫從子性嚴毅以氣節自命由貢生選建陽訓導擢諭旌德並勵清苦日以敦行誼為羣士切劘

莫不稱為賢師未幾遷教授遂歸篋中無餘貲所載惟古今書籍弟民慙少師事憲亦以貢為程鄉訓導質行剛方允有師範嘗刻競辰圖以勵諸生訓以儉約侈俗為之一變遷陽

朔教諭不赴而歸據從化志修

李曰芳字元暢水西人性純篤質直舉正德八年癸酉鄉試授南平教諭就官日盡以所入畀其二弟令之養親邑有羅

豫章祠久無記之者曰芳捐俸為之樹碑居六年巡按御史汪珊薦之遷長汀縣令以廉靜自守汀為文丞相勤王之地

而未有祠乃請于監司俾建祠祀焉據從化志修

麥春芳字蒲源水西人少英穎博洽以番禺籍補郡諸生弱冠以戴經魁嘉靖元年壬午省試癸未成進士授行人奉使

親藩丰儀端偉談論莊嚴甚見禮重轉行人左司副擢貴州提學僉事時黔陽學宮兵燹殘缺頗多至則崇膠庠飭祭器

置學田廣書塾新功令以作儀型著經說以式多士諸士會素稱驕悍皆怡然歸化今貴陽多傳禮經皆芳之遺也尋以

入賀便道歸省遂遭喪服闋卒于家芳孝友敦睦鄉閭推重之諸孫虬仕為南城兵馬副指揮據從化志修

趙鶴隨字頤素水東人其先贈監察御史介五傳至鶴隨穎悟善記補番禺諸生領嘉靖四年乙酉鄉薦授南京戶部司

務綜理出入無滯解戶稱便大司徒倚重焉三載署上考為

忌者所中左遷福建泉州府簡較擢知湖廣桂東縣縣居萬山中民悍逋稅又多盜鶴隨撫以恩義設方畧擒捕諸盜民乃漸服輸稅又嘗竭誠禱神以息虎患政譽大著踰年以病解印歸士民遮留載道鶴隨為人敦厚和易而行誼慷慨師費先生事之如父既歿為祠祀之恤其子孫終身人所難云

據從化志修

李桓字健夫水東人以貢授象州武宣訓導恬淡懇誠課士務得實功御史朱有孚委以州政州之東有猺獞觀望生變桓委曲開諭撫其首黃公穩二十餘人責令月朔一至公庭受約束變遂寢御史特加獎焉隨陞興業教諭濟貧生嚴考課多所造就督學高應芳大加器重擢為國子監典籍未就而卒所編六經要語及著履宦初稿藏于家

據從化志修

黎民表字惟敬自號瑤石山人御史貫長子也其母夢有羽幡者數十人從雲中擁一童子入室五色璀璨覺而生民表幼穎異十三為邑庠生舉嘉靖十三年甲午鄉試久不第授翰林孔目遷吏部司務執政知其能文用為制勅房中書供事內閣乙丑陞南京兵部職方員外郎時兵缺糧欲作變民表示諭諄切兵遂戢丁母憂起補戶部浙江司員外監通州倉轉餉雲中行至天雄召還掌秘閣侍經筵預修世宗實錄成晉郎中加四品俸修玉牒又修穆宗實錄加官至河南布政司參議萬曆七年己卯乞致仕疏三上允歸民表賦性坦夷內無城府好讀書博綜古典下及百家稗史過目成誦至其豪邁之氣閎放之才則獨立一時雄視千古先是督學田汝成侍御戴璟嘗試以治論大奇之操尚廉介不為脂韋不

事苞苴有故人交極厚來署南海篆事客持千金賄之爲解紛正色斥之至于親知喪葬則捐資賻助惟恐後少師事黃佐獨見雅重諸所論撰必與商榷居清泉山中開社日與弟民衷民襄友人吳旦梁有譽歐大任梁牧倡和其間明白孫蕢五人以來嶺南詩學復振民表與有力焉海內名流多所結納如文徵明父子王世貞世懋皇甫汈兄弟王穉登周天球黃姬水宗臣余日德沈一貫屠隆吳國倫李攀龍輩尤所友善生平工真草隸篆八分圖繪咸詣逸品尤精詩賦文徵明語人曰隸書嗣吾後者惟敬也王世貞嘗以歐大任爲廣五子民表爲續五子謂民表五言古自建安而下逮梁陳靡有所不出八七言歌行有盧楊沈宋之韻近體颯颯全盛遺音歐必元稱爲知言嘗與修廣東通志從化志羅浮志清泉

志所著瑤石山人稿梅花社稿北遊稿諭後語錄養生雜錄若干卷行于世歷任三朝累膺金綺之賜崇祀鄉賢又祀抗風軒弟民衷字惟和號雲野器宇端凝言笑不苟弱齡卽攻古文詞嘉靖三十一年壬子舉鄉試三十五年丙辰進士授行人擢吏部稽勳司主事歷文選晉員外滿三載陞驗封郎中絕意請托奸胥斂跡會有要求貴人欲得王府科者是科隸儀曹司宗室襲代賂至不貲衷以爲不可拒不與以此致憾適又有忌之者遂出爲廣西糧儲參政至則禁餽獻詢疾苦剔弊蠹甲子七月移鎮潯州季冬得代還省迎春之夕蠻寇銀豹等踰城劫藩庫眾莫敢格衷聞冠帶而出左右勸止不顧奮身直前率守者與戰力寡不支遂被數創輿歸署中同列來省視猶曰公等皆安在府藏尙存否言畢而絕城中

民皆哭撫按以事聞詔賜營葬銀五百兩廕一子京衛千戶
遣官護喪還家士民請祀名宦衷天性孝友仕終始以廉介
稱卒時年四十九有司封集行于世祀廣州府學鄉賢民襄
字惟仁號白泉歲貢少受業于黃佐佐深器之與兄民表民
衷偕梁有譽結社粵山講業有三鳳之稱嘉靖四十四年乙
丑膺歲薦抵京與王世懋吳國倫張鳴鳳唱和廷試後遽歸
里至豫章諸王孫聞其才名爭求讌集既歸日與諸詞人操
觚染翰丹青尤爲世所珍重號白泉山人大學士趙志臯嘗
官廣州折節交歡贈以詩有談元師鮑葛作賦擬機雲之句
年八十一著有清居集民表長子邦炎字君華號岱輿幼穎
敏應對如響司空陳紹儒以女妻之年十五補諸生領嘉靖
四十年辛酉鄉薦隆慶五年辛未進士授臨川縣令癸酉同

考所得士多取上第時花園積寇肆掠當路檄討之災出不
意一夕親率士眾搗其巢穴擒黠者數十人餘黨悉平撫按
上其功有白金文綺之賜母喪服除補定陶徵入爲吏部稽
勳司主事歷驗封司郎中尋擢江西右參政適黃梅巨寇流
劫江上留京震動乃移鎮湖口發境內勁卒禦之寇聞之相
戒曰是臨川神君擒剽花園者也遂散戊子致仕歸所著有
旅中稿南秀堂稿從祀廣州鄉賢

據阮通志修

李師周字原忠水東人博綜墳典嘉靖二十八年己酉領鄉
薦選江陰教諭脰脯無較以作人爲己任未幾以內艱歸起
復補羅源諭尋陞永興令弔死恤生輕徭薄賦簡靜以治民
甚安之居一載適值行部使者苛細周供帳勿備使者恚焉
會有謀中之者周曰吾豈勞民以徇五斗哉遂掛冠歸士民

攀轅相送周性骯髒多大節不問家人生產每見逐錐刀者輒為歎惋以故居官勵清苦居家絕干請與世寡合獨與海忠介瑞郭光祿棐以年誼意氣相善卒後祀永興名宦具載

柳州志人謂其一門孝友可風云

據從化志修

李佐字叔宰號南岡水東人十七歲補邑學弟子員二十五歲中式嘉靖三十一年壬子科舉人署廣西全州學正以師道自任激厲裁抑有方踰年擢梧州府推官優於吏治案牘迎見立解從巡按御史行部勾稽郡縣求大辟可生者凡破械出三十餘人梧人驚服晉湖廣辰州府同知奮於自効釐奸剔弊不遺力署辰州府篆著有異績辰人懷之如父母去之日追送數十里建書院祀之進階奉政大夫年七十五卒

據從化志修

黃鍾字繼賢水西人早歲有相者見而異焉謂之曰好自愛異日貴當金紫且得威柄時人不之信也嘉靖季大兵討山寇議撫餘黨賊宣言必得里老為招眾皆告免鍾名在籍中獨不能脫而賊首劉元威者最驍黠擁眾負固鍾乃挺身詣其營悉心開諭元威感服就撫願從鍾自效當事者大加獎賞鍾自此從軍隸何都司麾下獨領一隊元威屬焉屢從征倭寇嶺東粵西皆獲首功授從化縣所百戶世襲會桂林巨寇亂合諸省兵征剿鍾先鋒奪險直搗巢穴擒賊首周天王遂夷其地設立永甯州隨征岑溪荔浦多所擒獲久之累功遷羅定守備尋陞都指揮僉事歷游擊參將轉南頭副總兵善撫綏得士眾心再擢四川松潘副總兵踰年告歸南頭人生祠之鍾入厯險阻身冒矢石功在西粵甚著然椎魯不善

迎合卒後追前功加世襲副千戶劉元威亦累功為千戶子

孫得世其官云

據從化志修

鄧士昌字楚陽號泰瀛水東人弱冠有聲庠序中以選貢應博學宏詞科列名第七授中書舍人與纂修玉牒賜白金文綺寶鈔尋奉命賚賞遼左還入制敕房辦事掌封誥文籍時以冊封靖江王難其人當事薦昌可勝任詔加四品服奉命冊封有功贈父應麟如其官子兆元以番禺廩入太學中萬

歷戊午科順天鄉試南監乙榜

全上

鄧文炳字挺南號敬菴水東人少讀書五羊師事新城令郭公大治授以江門學術以主敬不欺為本隆慶元年丁卯鄉薦授浙江甯波府定海縣定邑四面枕海漕艘往來泉貨出入例有常供歲歸合者二千餘金炳到任曰此官物也令安

得私悉捐入庫莅政兩載省煩去苛民有青天之目然性峭峻不能與世浮沉多為執事者所撓不克展施慨然曰吾豈為五斗折腰耶遂掛冠歸里二十餘年閉戶謝客絕跡不入公門時論稱其有元亮之遺風云著有甯野集十卷行於世從弟文燦膺天啓歲薦隱居不仕卓有兄風

全上

黃應中字於理水東人十六補諸生萬歷五年丁丑以明經選入太學戊子授羅城知縣返棹至江西鞋山風雨大作檣折篷墮舟幾溺應中焚香叩天祝曰應中奉帝命父母羅城誓無利己害民神苟欲福此一邦其尚脫我風遂東轉得泊西岸與從者方騰而上回視舟已撼碎矣羅為廣右僻邑大半羈縻獷悍不事詩書而平西高懸布政三里故鮮受役輸稅應中至守鞋山之約一意拊循省刑減賦額外之歛概為

禁革民大感悅三里率皆向化又撫火黃甘源諸崗蠻獯歸編戶創建社學延師以教童俊人乃漸知儒業居三載以病致仕嘗創立祖祠割租供祭卒年七十一祀鄉賢上全

鄧良佐字德咸號玉菴水東人少有才名尤工翰墨領萬歷七年己卯鄉薦初選福建上杭令操持清謹政聲赫然杭人立生祠祝之尋以卓異陞湖廣沔陽州知州時楚地猖賊為厲所過城邑焚劫無遺佐至毅然以保守為任日則視事夜則登城捍衛隨上書督院易將選兵為剿撫計州民賴以安堵事平與民更始察民艱釐士習汰冗稅禁刁訟興利去害百廢具舉沔陽風化為之一新未幾以外艱歸父老扳轅載道立去思碑以紀德政焉子緝以番禺弟子員選入國學授廣西西隆州州判上全

歐陽潢字崇積水西人領隆慶四年庚午鄉薦謁選授歸安教諭以道學淑人所造就多知名士恒輸家粟以濟諸生之貧者復捐資創望道樓於學宮後尋陞南靖知縣興教惠民眾稱慈母有里役餽茶置金其內斥而罷之無何致仕歸橐蕭然比居鄉講學以訓宗族弗率者嚴誡之歲時非公謁合長罕得相見然邑有利害知無不言嘗倡率士紳控兩臺以復橫潭學租優游林下二十餘載卒祀歸安名宦子暉上全

鄧正吉字起元號自菴邑城人六歲失恃九歲失怙居喪哀痛盡禮祖鬻生心竊異之萬歷七年己卯登賢書丙申受任山西廣靈邑處邊塞俗多強悍吉剴判如流恩威並濟頓革其俗學宮久頽既修飾之又以祭器缺如非敬也乃捐資建置簠簋登鉶尊鬯籩豆各若干器諸生樂觀厥成請勒石記

之先是風教衰弱人怠於學應童子試者寥寥吉設學延師以教生童由是有舉於鄉者爲數十年開科僅事攝靈邱象子惠作人不異廣靈癸卯以賢能調繁令定襄靈民攀轅涕泣如失怙恃甲辰文闈復分考官以染寒疾闈事未畢而卒時年六十有七

譚煒號行陽水東人生而穎異數歲能文食廩餼萬厯二十二年甲午舉鄉試第三十二年辛丑成進士補行人三使冊封諸藩咸敬重之天性至孝祖母何氏早持孀節題旨建坊旌表擢戶部郎中給假省親會母病躬執藥餌衣不解帶一月父母連喪歎粥茹蔬哀毀苦塊中援詞林高克正例疏請足喪六年服闋復除戶部郎中陞平樂府知府俗盛巫蠱煒至嚴禁搜焚河有灘險捐資 平興學育才捐俸創尊經

閣增足廩額勤以課士府儒學訓導莫卒於官寔甚爲之殯殮仍助歸葬諸生藍體仁爲世誣非罪寃沈囹圄力爲審雪昭平縣猺獞黃公信等上踞民田煒密訪提猺獞協志歛銀冀薄研鞫力爲還之逐獞出境士民建祠尸祝擢閩嶺使離多陋規一切申革不畏強禦蠹幣肅清陞廣西桂平道值璫熾解組歸煗別厯中外二十餘年所過有聲士民思慕舉祀郡邑鄉賢所著有易本蓬溪筆範行世

李粹中字太冲水東人穎悟好學手不釋卷年十三通五經性理諸子卽能爲古文娓娓數千言二十一歲登萬厯二十二年甲午榜解元一赴公車杜門不出日著書以自怡懌當事罕識其面有慕其名以幣交者亦峻却不受事親孝處昆弟友恭後以祿養就饒平教諭日召諸生講論程朱要旨旁

引曲喻必闡明乃已貧者則捐俸周給之卒於官饒人號泣盈市著有讀史管見六經補註東山文集藏於家俱同上

歐陽暉字伯曦水西人萬曆二十八年庚子舉人授臨賀令臨賀故巖邑暉課士愛民通商減稅捐俸創尊經閣置義田建浮圖九級以壯形勝卓著循聲乙卯與同考擢南京刑部主事丁艱服闋改香河縣調南京錦衣衛知事時魏璫擅權忠臣被禍暉憂憤形諸諷詠有陰霾國事非之句逆黨以聞立逮厥獄坐以訕謗誣同知劉鐸拷掠甚楚暉恬無懼色大臣會讞咸壯之後杖譴放歸田里無何聞劉鐸鍛鍊致法遂趣裝買舟託為上平之遊及抵飛來峽唱然曰璫恨深於劉劉不免我何能獨生遂赴淵死時年六十有一聞者哀之崇正初錄逆璫擠陷諸臣乃復原官臨賀祀名宦邑祀鄉賢著

有寓燕草生還草及端雲山房集

據張府志修

李相字九州水東人多膂力嫻孫吳兵法由武生授本邑所百戶歷功陞瓊崖參將會賊首陳長脚流劫起相召募尚兵勦之復平增龍南韶羅定諸山寇進副總兵時楚寇張獻忠犯粵奉旨回省會征相由連州朱岡星子統領尚兵身先士卒大敗張寇恢復湖廣衡州府藍山嘉禾新田臨武四縣楚粵安戢叙勲加前都督同知總兵官又蕩平山海流寇陞都督定國將軍加宮保管理楚粵軍務事卒於家長子承銘功陞指揮僉事世襲都司管理東莞城守副總兵次子承鏞同平楚功授遊擊分守會甯水陸副總兵又嫡姪孫雄鎮隨征山海諸寇功授都司僉事據從化志修以上從化

戴琳戴瓊龍門詹村堡人少剛直尚義縣治未立之先因開

鑄釀亂賊嘯聚帽子峯藍漢山等處宏治五年制軍奏請征
 勦琳兄弟率所募勇士衝鋒斬賊首高任子江天青何跳牆
 鄧福壽等連破十七寨院道給銀賞功九年置縣琳將前賞
 功銀助築城垣並董其事功上世免夫役同時許瑛琪鐵岡
 人亦有膽力宏治初藍漢山帽子峯賊發瑛琪結勇士冒險
 當先不避矢石屢立大功後死於陣人咸惜之據龍門志修
 劉獻字宗信祖仲明為元城三世孫謫惠州過社潭愛其山
 水遂留居焉獻其裔孫也長身玉立眉目清麗少敏悟擅經
 業時未置縣食餼增庠最居諸生首為學使所器重累舉不
 第由賓興升太學生兩至京師既歷銓歸益厭時好雅慕陳
 獻章之為人因林時嘉謁請作先世祠記往返至再共宿小
 廬山精舍數閱月無少怠閒聞獻章語以可仕可止之義遂

釋然自信不復有願仕意獻章以詩送之歸建鐵漢樓於馬
 園岡讀書其中悠然自得會朝廷詔天下士有愿滿而不願
 仕者授七品職銜獻喜謂人曰獻祿不逮親是差可慰吾親
 於地下矣乃起授沔陽州判致仕粵人在京師如倫文叙輩
 咸贈以詩還次徐州冒病三日而卒年六十三櫬還二子以
 不及斂易棺面如生人皆異之獻章嘗以茅筆書一崖二字
 大徑尺以贈獻獻即自號至今墨跡尚存據龍門志修
 李元厚字致遠世居圍子山即今城東塘唇慷慨好義值荒亂頻
 仍無論識與不識周卹不遺餘力七星岡皆元厚產且有先
 人墳塋在宏治間置縣元厚亟遷墳讓地時於城外東南度
 地居民復厘元厚稅田頃餘元厚恬然不以為意官酬其值
 不受乃給牌永遠免役以優獎之迄今父老猶有能言其德

量者全上

葉霑雨邑廩生重信義有武畧時山寇剽掠霑雨散財募勇士以相保聚嘉靖間分巡使者檄捕反寇文朝至而夕獻俘後奉府檄滅黃孫尚寇赴博羅縣召斬賊首亞公總平之卒西江源賊圍城急知縣劉潛以蠟書召霑雨賊聞之解圍去霑雨追至鐵岡斬賊數百破其二砦奪回俘掠隨同副將翟子奇奮勇搗巢遇伏皆死之訃聞野哭巷弔上官令立祠于演武亭左歲祭之子奇配焉其後兄霑霖剿大寇鄧廷鳳黎永元亦死于戰又有黃茂光者鐵岡人隆慶辛未水源賊流劫茂光率鄉勇三戰三捷殲賊首劉四德後為賊所襲沒于陣縣旌其廬據郝通志修

廖翰標天啟元年辛酉舉人官江西新城知縣廉惠民為建

祠大清兵破龍門翰標以二幼子託從父自縊死

國朝賜諡節愍

據明史張家王傳勝朝殉節諸臣錄修

廖大科由恩貢授廣西北流令前令議墾田田未墾輒增課民折產于虛額者什九大科至亟白兩臺虛課悉蠲北流土豪向乘催科急持母錢代人既而責償奪盡民精大科察弊寬徵而嚴禁之民困始甦及解組歸攜桂林桂樹植于鄉人因目其居為桂林據龍門志修

郭用賓號星陽萬曆二十二年甲午舉于鄉授福建甯德知縣以清廉著聲致仕歸倡率後學講文藝藉其裁成者甚眾同邑譚學源號又損十五遊庠三十鄉薦出宰廣西貴縣民懷吏畏解任歸置祭田崇祀事鄉鄰之貧窶者常分粟賑之又有蘇韶以歲貢仕至福建邵武府教授邵武田多苦旱韶

教民築陂設車灌漑民蒙其利卒于任郡人立廟祀之據龍門志

廖吉人字拜身崇禎六年癸酉舉于鄉任江南黔縣令愛民

養士介節自持解組歸琴書自樂不預世事人皆高之據龍門志

修以

湛懷德增城沙貝人若水之高祖也元季多盜練鄉兵保障

都邑懷德為頭目遙授元帥以恩威禦眾眾皆受約束懷德

部卒有盜池魚者于法當斬命歸辭其父母自來就死及期

果至懷德曰若誠當死雖然以魚殺人吾不忍矣戒飭遣之

嘗歷他堡見其頭目有以微罪殺人者憐之乃紿曰願借殺

于吾鄉以懲不恪以之歸潛解縛縱之以既殺報于是他堡

皆感激泣下願為之死洪武十四年東莞賊蘇友興作亂朝

命南雄侯趙庸為總兵官討之邁海戰不利懷德仗義帥敢

死士往救官兵獲解南雄侯卒破賊而還居民之近賊巢者

以降賊放發各衛所充軍獨甘泉民以保障得免有司建護

國保境祠祀之據增城志修

陳仲光沙貝人剛勇有謀略東莞蘇友興為亂脇鄉民以益

其黨都指揮提兵至將大行洗蕩禍延其鄉仲光急挺身赴

總兵官白其脇從狀爭之再三事得解鄉民免于屠戮仲光

賜也據增城志修

賴麒興少負奇氣洪武十四年鄰賊蘇友興構亂麒興慨然

與長沙鄉人廖孟璿連誓募義兵往隸南雄侯趙庸聽調發

討捕立功率所部兵歸本邑關子洋殘寇設伏待之為所陷

死焉據黃通志修

張度字景儀風儀偉特未冠時有相者見之曰山角淵庭柱
石材也以才學聞元季舉茂才為肇慶路高要縣教諭遭亂
棄官歸洪武五年壬子舉于鄉計偕如京師會罷科舉詔選
賢能補憲職遂擢御史時諸勛戚多怙勢作威度上疏奏劾
不避權貴高帝重之嘗建議立張巡許遠廟于歸德州以勸
忠上命有司舉行魏觀知蘇州治張士誠故宮為府署有司
以為言高帝使度偵之度往變姓名為日者入吳縣學宮廉
其實還奏稱旨擢知常州府治政公勤人不敢干以私雖公
務倥偬不廢文業郡中學校藹然前郡守何用修公廨建庠
序祠宇未畢以罪去度力終其事而民不以為病治行為畿
輔第一召為吏部侍郎條舉選法之不當者數十事皆見用
進本部尚書藻鑑人品銓選得體時帝用法嚴朝臣以忤旨

護譴誅死無算度一日檢案牘有小誤惶懼遂卒事聞帝曰

度乃至此耶使人發其篋僅數金歎惋良久命以大臣禮葬

之度為人清謹有用世才鄉人尊之因為立祠並祀鄉賢以

為有崔清獻流風云度之弟峻熙輩亦以學業聞據黃通志增城志修

陳敬石灘人洪武十四年以賢良舉授禮部主客司郎中遇

事果敢人多忌之左遷雲南曲靖府幕官尋署劍川鄰寇竊

發來攻州城敬親率壯士禦之眾寡不敵眾懼欲退敬瞋目

曰死耳賈勇前進遂力戰死軍民咸聚哭賻焉事聞命有司

恤其喪據廣州人物傳修

張迪有學識而善幹辦洪武四年以薦授御史抗疏劾權貴

有直聲未幾忤旨左遷弋陽知縣廉靜明決有惠澤及民馭

吏嚴峻後以事被逮縣民何溥等千餘人赴京奏其治行宥

還職尋復召為御史據江西通志修

謹案阮通志云增城丙子志張迪張度皆洪武五年
壬子鄉舉考永樂增城志二人皆列儒士又考宋濂
撰張度之父復禮墓誌則云度以洪武四年受薦得
官濂與度同朝應足據也

湛若水字元明初名露字民澤避遠祖諱改為兩沙貝人父瑛母陳氏禱于

甘泉洞而生雙瞳隆然兩耳旁有黑子左七右六宏治五年
壬子舉于鄉從陳獻章遊獻章以其沈潛許之嘗與書曰民
澤足下發來書甚好日用間隨處體認天理著此一鞭何患
不到古人佳處也自是潛心默會日有所得遂焚去路引誓
不復仕後定今名若水云母命之出僉事徐紘亦為勸駕過
南昌謁莊景極為稱許乃入南京國子監祭酒章懋試睥面

盜背論奇之十八年乙丑會試學士張元禎楊廷和為考官
得其卷見其論用至近至神等語曰非白沙之徒不能為此
置第二賜進士選庶吉士授翰林院編修時王守仁在吏部
講學若水與相應和京師場屋所取士修撰呂柟主事王崇
慶輩從而和之由是道名大著學者稱甘泉先生尋出使冊
封安南守仁贈以文安南國王餽金却不受贈以詩有白沙
門下更何人之句明年丁母憂廬墓三年產瑞瓜九實相連
人以為孝感所致築西樵講舍士子來學者支與日給錢米
開禮舍于僧寺至必齋戒三日先令習禮然後聽講嘉靖初
入朝上經筵講學疏謂聖學以求仁為要已復上疏言陛下
初政漸不克終左右近侍爭以聲色異教蠱惑上心大臣林
俊孫交等不得守法多自引去可為寒心亟請親賢遠奸窮

廣州府志 卷一百二十五
理講學以隆太平之業又疏言日講不宜停止報聞明年進
侍講復疏言一二年間天變地震山崩川湧人饑相食殆無
虛月夫聖人不以屯否之時而後親賢之訓明醫不以深錮
之疾而廢元氣之劑宜博求修明先王之道者日侍文華以
裨聖學已遷南京國子監祭酒作心性圖說以教士拜禮部
侍郎倣大學衍義補作格物通上于朝惟編事實不爲論斷
俟聖心自悟也嘉靖九年十二月初八日上勸收斂精神疏
歷南京吏禮兵三部尙書置新泉三山二庄田講學于新泉
書院江都縣西有甘泉山山下多田監生葛澗立甘泉書院
由是書院徧于天南江都及貴池等處所在皆是南京俗尙
侈靡爲定喪葬之制頒行之條奏兵民便宜十事皆報可又
禁火葬毀淫祠有劉公廟聚眾燒香爲沈其像于江以絕眾

惑買地爲漏澤園以處貧不能葬者且置田供時祀盡毀私
坵尼菴勒令歸俗滿考九年吏部奏其績老請致仕年七十
五因取道江浙泛錢塘遊憩武夷久之慕羅浮之勝構精舍
于朱明洞建書院于青霞谷自撰羅浮志一卷日夕端坐石
上未嘗至家年九十五卒于所居小禹洞有大星隕于廣州
河南聲如雷訃聞賜祭葬若水生平所至必建書院以祀獻
章置倉廩以館穀多士刻崇儉約言以挽奢俗置講田以贍
四方學者年八十又至衡山建白沙書院置田五頃歸復取
白雲山爲白沙祠自其祖江以來田連阡陌世爲土豪若水
益增田宅歲入數千而性好食宿肉沙飯居漂搖危樓營建
歲無虛日人皆異之年九十猶爲南京之遊過江西安福鄒
守益守仁弟子也戒同志曰甘泉先生來吾輩當憲老而不

乞言慎毋輕有所論辨若水初與守仁同講學後各立宗旨
守仁以致良知為宗若水以隨處體驗天理為宗守仁言若
水之學為求之于外若水亦謂守仁格物之說不可信者四
又曰陽明與吾言心不同陽明所謂心指方寸而言吾之所
謂心者體萬物而不遺者也故以吾之說為外一時學者遂
分王湛之學湛氏門人永豐李懷汝德德安何遷益之婺源
洪垣峻之歸安唐樞為最著常德蔣信卿實宜興周衝道通
則並遊王湛之門云隆慶初贈太子少保禮部題請賜諡曰
文簡海內翕然稱為近代道學儒宗子東之廕襲知府孫恭
先最賢克繩其武生八子敏學競爽盛德之後必昌云

據阮通志

林暎字子覺少倜儻自雄其才遊于陳獻章之門亟稱之讀

書于南海廟大書一聯于其門云白浪起時浪花拍天山骨

折呼吸雷風黑雲去後雲牙拂渚海懷開吐吞日月御史按

部謁南海神見而奇之欲召見暎請士相見禮御史重其才

竟禮之

據粵大記修

尹鳳字舜儀天性孝友連喪二親泣血六年腰經不去身遇

所生日不御酒肉閉門悲思輒逾日言行有古人風與湛若

水同遊陳獻章門築萬竹臺于九龍巖相與講學因號為萬

竹嘗與邑顧鸞鄭潔温裕趙元甫湯璽共一十七人構鳳臺

詩社相唱和邑令朱文簡嘗造其廬贈之詩有縣官到門日

三丈萬竹主人頭未梳之句屢賓于鄉卒年八十二湛若水

為之表其墓

據增城志白沙弟子傳補編修

吳澹字源深石灘人景泰四年癸酉鄉薦天順元年丁丑進

士初令弋陽以古循良自期日與諸生講學習射而助其不給復立義倉儲粟十萬石以恤民時有中貴人至縣暴橫需索莫之敢撓澮力與之抗曰倉卒失供備此令罪于民何尤中貴人爲斂威歲早祈禱行烈日中甘雨隨注性端謹坐廳事斷獄未嘗左右顧有問弋陽髻何似者澮不識也居六載邑中利弊興革殆盡政平訟理淡泊自甘民餽土物謝不受御史陳選薦其賢入觀考最爲天下第一賜衣一襲吏部抑之僅遷饒州府同知清操愈勵廣信卿大夫高明等率六邑民上奏願借澮爲郡守命未下而卒年三十九卒時惟一老僕在旁僚屬發篋視之不足于斂訃聞于弋如喪考妣士祠于奎星樓民祠于縣治東澮生平言不苟合行不苟從目不苟視邑庠諸生相戲謔或出鄙語則掩耳不聽諸生皆大笑

嘗讀書一室女僕戲于旁澮怒白其母斥之乃已其爲政清

而不苛惠而不費所至民皆思之性喜吟咏庭前有古梅二

因號雙白居士蓋自況也所著有雙白集祀鄉賢據郭通志湛若水撰

傳廣州人物傳增城志修

李聰字子奇幼讀書知大義天順甲申廣西流賊犯境聰父

伯昭在西淋別墅爲賊所執聰激切挺身不畏攜金往救父

竟得生還聰爲他賊所殺據戴通志修

謹案別有一李聰順德人成化丙戌進士

胡璋字資禮龜峰舖人成化十年甲午舉人任甌甯令在任九年多善政民俗窳陋親死不葬爲壇焚之再舉女者溺諸水璋聞而傷之下令禁不能得乃毀其壇密偵溺女者其鄰不舉則併罪之俗始爲變任滿上印綬歸民乃思之不能忘

祀甌甯名宦

據郭通志修

姚珩字鳴玉鴉岡人負雋才登成化十三年丁酉鄉薦二十年甲辰進士歷戶部郎中性清介時四方運糧集京師舊例按所至先後以次收納有以百金求速之者僕以為言珩杖其僕而遣之自是人無敢干以私奉命理邊餉痛革舊例餘耗人稱其廉卒于官旅櫬蕭然士民賻贈乃得歸祀鄉賢

據黃

通志增城志修

盧綸字朝言號望峯會仙舖人兒時丰采秀異雙眸炯若曙星而器宇凝重年十二能屬文日誦數千言宏治八年乙卯舉人十五年壬戌成進士授行人嘗以使事至安南安南人以八寶盤為贈辭弗受安南重之遺之詩有名樹銅關月清搖桂海風之句遷戶科給事中轉吏科右歷兵科左遇事侃

侃無所避武宗初劉瑾用事綸抗疏劾瑾奸狀不報三年六月瑾得匿名書怒甚詔百官悉跪奉天門外頃之執庶僚三百餘人下詔獄時酷暑多暍死者綸獨氣舒若有神助得不死旋奉命核大同等處軍餉大檢諸侵蠹不法事直聲震一時人多忌者出為四川參議所屬大饑或欲請于撫按俟報允乃賑綸曰民旦夕且死若案牘輾轉延緩則索之枯魚之肆矣彼汲長孺者何人乎于是出庫銀糴穀復檄諸州縣出贖罰銀糴穀以糴多少為殿最得穀數萬石民獲甦者數十萬焉所屬有地瘠民貧而差役與沃土等者又有鹽戶課重而雜差與民戶等者綸覈實權其輕重而均通之令下權聲載道正德九年乾清宮災興工營建遣侍郎某人蜀採大木專倚辦于綸及得一大木後先用輓者萬人出之山中至平

陸民力告竭而距水猶三百里綸為文祭木請輕之是夕忽大風雷雨江水暴漲高丈許大木遂順流而下不知所向屬吏或危之綸曰無恐此神之相我也越數日得報則已下湖廣彝陵界矣武宗嘉之有金幣之賜以按察副使備兵至夔時流賊未盡其首御馬子淹老人等為蜀患又千戶文獻集亡命有異志綸俱勒兵誅之陞四川按察使適楊廷和當國子弟怙其勢橫行鄉里綸置之法廷和祈免不聽銜之以事罷綸綸遂致仕歸嘉靖初藍漢良田賊大橫兵備道王大用提兵駐增城剿捕綸為之畫策擒賊首黃雪梅餘黨殄戮境內以平綸素為鄉人所信服訟者多不赴官願就綸質初綸罷官時母蕭猶康強無恙每旦問安進飲食必躬親不假手婢妾比歿痛絕復蘇蔬食三年未嘗露齒伯仲皆早世無者

子猶己子為之謀嫁娶所有田宅皆分割畀之足蹟不至會城者三十餘年縉紳有未識其面者卒年八十有九孫應科嘉靖三十七年戊午鄉薦望江知縣應徵萬曆四十六年戊午鄉薦曾孫偉弼俱歲貢明季授弼戶部主事改湖廣道御史其後人多賢隆慶二年祀綸鄉賢祠據增城志郭通志修

湯文經字懋誠北門外人中宏治十一年戊午舉人授江西臨江府通判通判故閒職任之者多闕冗養安文經彌自振刷不敢怠前守獄多賄屬有孀女草烏之冤文經為平反又議建峽江縣以扼盜衝正德十四年甯王宸濠反南昌都御史王守仁駐吉安起義師討賊臨江守戴德孺及文經皆起兵應之時軍府新建諸事倉卒下令造戰艦甚急文經不踰旬而成百艘守仁才之乃令督哨遂從守仁破南昌又戰于

鄱陽擒宸濠俘獲甚多會朝列有忌守仁者其官屬論功多不錄文經判臨八年以年資稍遷福建延平府同知延平有浮梁商稅屬同知向皆厚征困商旅文經薄之府僚供億咸資之庫吏充是役者率破家文經任三載惟以折薪自給及罷官橐可垂也順昌有老僧自山中出遺之布文經為選受一端太守屠喬嘆之曰公宦歸一貧如此哉歸而坐嘯北阜不問家人生業惟積書數千卷屢名諸子謂之曰吾以此遺汝踰萬金產矣時邑中尚書湛若水以道學著憲使盧綸以直節著文經以博問篤行介其間稱三賢據增城志修

眾嚴以訓族長兄元從子以良俱領鄉薦歷州郡所至著政聲據增城志修

陳廷璉石灘人體貌魁梧性嚴峻為諸生時憲司某延之教子有鍾姓者訟將屈以百金囑廷璉為緩頰拒不受中正德八年癸酉舉人授應天府推官獄無冤滯稱明允尋擢南京太僕寺丞五疏乞休歸舊屬戴某故交陳某皆官廣東屢致書招未嘗往見其風節如此據增城志修

謝禧字永錫馬鞍岡人素性恬淡不競榮利師事湛若水而與黃佐友善信陽戴冠謫烏石驛丞亦器重之以歲貢入太學屢試高等授湖廣湘陰知縣多惠政不阿上官在任數年縣人稱其清直一日夢兩女衣暈翟珮聲璆然曰廟余福汝求之得英皇廟故址乃它材重構庭宇皆壯麗而兩耳由是

失聰會御史行部至湘陰索夫挽舟弗應御史既不憚與之
言第唯唯御史怒甚作聲呵之禧遂拂袖歸歸而兩耳復有
聞也亡何章聖皇太后崩議梓宮南祔世宗躬詣睿皇帝陵
所相度道湘陰從官大擾繼禧者乃以失供具倉卒被誅禧
家居得免據增城志修

張潮字允信號春岡儒林舖人少孤貧力學正德十一年丙
子舉人縣民有主盜者縣令王大用訪得之將治其事餽金
數百求解潮厲色叱之大用益禮重焉嘉靖間授建始知縣
彝俗悍而愚多逋賦悉籍之邑校弟子員缺潮擇民間俊秀
二十餘人教之讀書朝夕課所業業成請于督學悉收之士
習遂向風無何解官歸行李蕭然士民立碑以紀去思至家
晚節益勵時湛若水倡道于增潮年七十三願納拜著門下

籍若水一見呼為老友請為明誠書院長凡士之從若水遊
者必使之先詣潮所隨其資學淺深開導懇款周悉皆充然
若有所得或若水至書院開講潮展書恪立白髮穆穆終日
恒無倦色論者以為甘泉之有春岡猶陽明之有蘿石云年
八十四卒所著有游藝集祀鄉賢據增城志修
黎釭字以和為人敦樸恬淡能文章不樂仕進嘗隨父宦西
粵飲水茹蕖晏然自適父深喜之遣謁湛若水聞講心性之
學至數日徘徊不能去若水謂其可進于道云性好施予里
中有骨暴者殮弗給者罄橐囊之御史潘珙為之志墓據增城志修

單雍隱居羅浮嘗從湛若水遨遊于四百峯之間素有高義
嘗代輸族人遺糧拾旅人遺橐金追而還之據增城志修

黃衮字朝儀南門里人性孝友父蘭諸生食餼當貢為學使所糾忿成病衮侍奉惟謹適叔苴卒父命衮為叔後衮以親在辭族人因謀逐苴妻梁而奪其產訟于官梁誓不改節以衮為依衮不獲已乃入繼惕然曰修省工夫當自此始事所生所後父母如一子夢說歷官辰州府判以所入俸致饋衮泣薦于家廟置祭田焉又出穀數百石一以奉母梁氏祀一以備耐祭一以調族黨之貧者年八十卒夢說字肖甫嘉靖二十八年己酉鄉薦授知邵武縣適土寇竊發繕治城垣募土兵又立寨團鄉兵守之而嚴保甲之法賊平美政具舉遷辰州府判辰介黔楚苗人弗靖夢說單騎入溪崗召其酋論以禍福利害皆俯伏效順外艱歸三年腰經未嘗去身不復有用世意里人張度為名冢宰失祀乃即其故居祠之人高

其義年九十二卒有拾餘稿行世

據粵大記增城志修

黎皓字廣暉慶隆舖人貧而介諸生時常假館于友人阮某所阮之僕盜金器數事匿于牆隙皓窺得之悉舉以還阮又適棠溪暮回道遇遺橐得五百金明旦復走故處伺所遣人悉歸之以歲貢授南昌經歷請移檄本省給半俸養親以從征功遷陽朔知縣其地獠獍雜處傲狠不供賦皓諭以大義輸將惟謹又擇其慧者延師訓之由是彝俗皆化為良民後解組歸分諸子惟純脂一韻據張府志修
伍閻字太和沙貝村人從湛若水遊亟稱為聞道嘉靖七年戊子舉于鄉授武城教諭時推其文行遷聊城知縣廉公敏惠苟有利百姓者毅然身任不惜勞瘁值大水民饑力請于上官得粟七千餘石以備賑聊故多積蠹若排甲厥夫馬頭

驛傳稅糧弊竇百出閭秉燭料檢每達旦剗剔殆盡凋瘵以
甦丁艱歸聊民郊送相向哭服將闕民又相率走京師請于
朝願得伍令不許補泉州南安治南安一如在聊城時遽得
疾卒篋中無所有覓一棺不得而時方盛暑邑人各懷鏡以
進環布左右護其尸僉事黃澄以棺贈之知縣黃源致衾襚
焉比喪歸哭聲震江滸聊民間之亦流涕焉據張府志修

胡庭蘭字伯賢龜峰舖人璋之孫也少負雋才久淹芹泮及
嘉靖二十八年己酉鄉試中榜元連登進士任南民部主事
有能聲權揚州稅浮于額凡羨悉籍報之陞署陝西司郎中
時東南多警務足餉運時有脫巾之呼庚辰夏督學閩中聞
素多才而俗善鑽刺一切謝絕之倭夷入寇守當東門領兵
登陴寇焚城風從之率眾焚香祝天風旋西轉寇多被燔者

各鄉民望城而奔守者拒弗納庭蘭曰皆吾赤子也忍驅之
鋒鏑乎開門入之寇既退行部及莆寇又猝至庭蘭決策募
精兵突出擊之斬首數十級寇遂退乃治舟師殲勁倭于峰
頭澳時稱奇功然竟以骯髒取息調僉于滇至則諸夷跳梁
院檄監易門軍計擒温天王李向陽于鴨母谷又擒木址賊
首方廷美嶠峨賊首趙大經新化賊首楊弦子等所向皆有
大功二臺立石碧雞以紀其功然謗書盈篋矣乃拂袖歸作
雁塔以壯風氣令游某為作崇德記隆慶六年穆宗念其功
齋白金文綺就其家賜之然不召也所著有詩易講義湘江
子集卒年七十五祀鄉賢據粵大記修

劉維嵩字鎮中石下村人嘉靖三十七年戊午舉人隆慶二
年戊辰成進士授大理寺評事念祖母黎老上疏乞終養略

曰臣生六月失母臣祖臣父先後棄世臣後母弟亦相繼淪沒僅存弱息年甫七齡內無叔伯之親外鮮姻黨之助賴祖母黎氏懷抱鞠育至于長成朝夕紡績供臣讀書祖母黎氏年踰八十有二老耄衰憊舉目無依臣不忍遠離膝下而祖母促臣赴試至再至三臣恐傷其意勉強束裝北來入試偶蒙甄錄不意近得家報祖母視愈昏不辨咫尺行步愈艱不離床褥望臣之歸不啻饑渴臣一聞斯語憂思倍積昔李密謂臣無祖母無以至今日祖母無臣無以終餘年臣之苦切殆謂過之伏望皇上俯加憐憫將臣放回原籍以便侍養則優恤之恩真同天地之覆育矣遂歸歸而遭疾竟不起

據增城志

黎派字惟遠慶隆舖人隆慶元年丁卯舉人授宜黃教諭嚴

立科條務多識蓄德為有用之學士習丕變遷安南知縣時值倭寇之後警備未息徵役繁興派以意為伸縮上不廢事下不病民且革重耗省繁刑行之三年民以父安興泉道檄屬縣報羨金將以上下其考派弗應忤其意遷吉府長史派為人慈諒謹厚居鄉于鄰里多所賑恤伯兄朝勳以恩選閩

邑丞亦有廉聲

據張府志修

陳經翰字忠甫通陰符習風角秘占精陣法以從軍有邊功授狼牙總鎮相視要害出俸建城屹然稱金湯遷潮州漲潦暴發漂民田為築堤濬淤民無蕩析比歸初來鶴亭招客賦詩讌遊其中著有遊燕遊嶽稿山中志懷諸書經翰為人孝友惇篤個儻仗義聲如洪鐘善談論文兼眾體有古儒將風

據張府志修

盧崇勳字惟敏別號洗慎沙貝人生而穎異弱冠以壁經補弟子員萬曆十六年戊子舉鄉試甲辰初合分水適災賑活數萬命力請蠲糧九百餘他如禁淹沒勸農造士績不勝書已酉陞漳州郡丞分水人立去思碑建祠漳州丁外艱徒步奔喪壬子起復補漳署篆詔安解礦數百癸丑察盤泉州甲寅權海澄稅乙卯署南靖賑活饑民甚眾丙辰署漳浦戊午兼署海澄龍巖各邑時海寇將作難崇勳擒其巨酋海波為清洋商頌德勒碑後又獲逆首六人當道欲庇之崇勳執法不阿遂左遷福藩長史以母老啟辭不赴承歡膝下凡六年而母歿庚辰奉恩詔進階中順大夫享年七十有七祀分水名宦並祀郡邑鄉賢據黎德明撰墓誌漸江通志張府志修曾受益字而吉槎岡人中萬曆十六年戊子舉人累上春官

謁選授福建甯德知縣為政務教化不事刑罰縣故瀕海海潮盪激蝕民田有田去而糧存者請于上官除之又條鹽法利病所司下其議著為令未幾以親老乞致仕居家如建學宮築城臺修邑志關於桑梓重計者力贊當事行之年九十三卒有吹劍集行于世據增城志修

吳綱字內閣一字錦先龍池人萬曆二十二年甲午舉人知黃巖縣至即誓于神勿私入一錢歲祲不忍追呼府檄贖軍餉甚急民恐負秉燭爭輸不終宵有溢其額後左遷福建都事尋改樂清教諭任滿經黃巖客舍百姓相與扶輿入公館拜謁者日以千數擁傳不得行至樂清課諸士一遵先儒規則言坊行矩善屬文寒氊六載清操愈勵遷雲門知縣前此有山陰蔣汝礪臨海王立穀皆一時師表學中口碑云前有

蔣王後有吳潘潘名明遊據台州府志 温州府志修

潘禹謨字明叔湘江舖人少有文名領萬曆二十八年庚子

鄉薦三十二年甲辰成進士授鄱陽知縣甫下車詢民疾苦

懲土豪革衙蠹禁誣罔決疑獄以賢能著聲嘗修鄱陽志八

十餘年逸事搜括靡遺稍遷南京戶部主事督儲鳳陽暮月

卽丁外艱歸舟次十八灘以哀毀成病卒軍民為立去思碑

于鳳陽鄱人建祠祀之崇正元年有司舉祀鄉賢據金通志修

王三奇字萃乾慶隆舖人萬曆二十八年庚子領鄉薦癸丑

授江西建昌府推官時建昌大饑無所告糴闔郡洶洶將為

變三奇設法賑之亂民遂息辨盱江冤獄出枉者三十餘人

有神明之稱為巡按御史所任權稅兩河憫商困特為寬減

諸商感之無何忤上官左遷廣西布政司照磨轉陽朔令未

幾解組歸性至孝事繼母老而不倦崇正十二年舉祀鄉賢

祠據增城志修

何天球字憲周沙貝人萬曆三十四年丙午鄉試中式授永

平推官嘗檄署遵化玉田薊州印務並以廉明著聲又檄理

遵化軍餉駐遵化已擢乾州矣撫按官以東事方急留之崇

正二年冬十月戊寅

大清兵入大安口十一月壬午朔京師戒嚴時山海關總兵

敗沒于遵化甲申大兵入遵化天球與巡撫王元雅等俱死

之明年樞輔孫承宗請卹殉難諸臣贈光祿寺少卿賜祭葬

廕一子入監讀書子縣學生鼎鉉匍匐走遵化尋天球遺骸

歸以毀卒于途人稱其孝天球祀廣州府鄉賢祠據增城志修

何日瀾字靜觀接龍舖人中天啟四年甲子鄉試授澄海縣

學教諭廟學歲久傾圮捐俸倡邑人新之遷沛縣知縣運河壅塞需丁夫疏濬督責嚴峻民多逃亡日瀾受事設法召募以應之漕艘無梗而民心亦定俄礦賊逼沛城率士民城守兩月餘賊知不可下遁去總河張國維與撫臣交疏薦之是時東事方棘中原寇大訶關陝楚豫無甯日朝廷汲汲議征討籌兵餉而淮南北諸郡連歲旱蝗饑饉臻民不堪命為令者請免不可請緩徵不可則請改本色為折色部議從之既而以軍需故于折色外復催追本色日瀾仰天嘆曰吾誤吾民矣甯死不可以再徵羽檄紛至皆廢閣不行亡何天下以催科不力提問者凡四百州縣日瀾與焉檢橐中裝不盈十金無以具道里費有朱一麟者倡士民贖之乃得械手足入京布政寇汝嘉代之申辨疏至釋還故職然日瀾業已憂

勞得疾遂卒于都門據增城志修

蔣亞奴三歲父喪家貧不能學母口授以孝順事實皆能記憶稍長每旦出採藥賣于市給菽水雖食貧終身而侍其母無不豫之色年五十餘母卒亞奴哭仆地幾絕久之始蘇及葬廬墓三年好事者疑其偽一夕有盜經其廬亞奴急奔墳上伏而哭曰母無恐奴在此頃之一虎突出盜奔去自是人皆信焉據張府志修

劉若鱗字而躍喜談兵每自許奇男子嘗入太學時唐王聿鍵詔大學士蘇觀生領儲賢館分十二科招四方士觀生薦之若鱗遂率鄉族間忠義士三百餘人勤王從觀生騎防南安屢立戰功授南安都司順治三年

大清兵破吉安總督萬元吉乞援觀生遣若鱗率所部三百

人助元吉協守綿津灘未戰而潰元吉退回贛州若鱗遂從觀生屯南安贛州復告急觀生又遣之率三千人助元吉守贛值他將戰敗乃復從觀生還南安九月唐王死汀州贛城亦破若鱗遂從觀生退入廣州立唐王弟聿鏐是為紹武時永明王自立于肇慶而邑人盧弼為永明王主事改御史皆一時而各事其主兩王不相能日治兵相攻若鱗知大事不可為遂辭職歸適弼亦棄官還兩人結為姻親皆絕意北進年八十餘臨終謂家人曰吾出不能事君而處不及事父一生抱愧當席藁葬我於吾父墓側孫宏學舉人據張府志修南海李徵爵分纂南海梁起初校番禺金佑基再校番禺史悠泰三校順德羅槩四校

廣州府志卷一百二十五終

廣州府志卷一百二十六

列傳十五 明新會

陳添佐 南海李真祐

黎貞

劉樂善

梁臨

鄧信

鄧彥良

湯有容

茹連

鄧林 余慶

伍驥

蕭嘉祐

温琇 李讓

陳璉

梁繼灝 子益 孫文

林超

蔣濬

陳獻章 父琮

張紳 父秋逕 弟紀 子瑛

伍瑞

楊英 子敷

李渭

譚以賢 父仲和 弟以良

李翰

張璧光

伍雲

容珪

易元

湯霽

陳瑞

余諒

余統

余敬

林紹光

黃子賢

區越

易龍

周京

馬廣生

黃球

何述

魯能

陳經綸

易之教

子元履 元晉

從子達

子必誠

子子正 孫孚 澹

子子正 孫孚 澹

子子正 孫孚 澹

子子正 孫孚 澹

子子正 孫孚 澹

子子正 孫孚 澹

子子正 孫孚 澹

李文明

陶益

李悅

容璫

黃龔

林大章

陳試

李積

勞守謙

李以龍

黃尊

鄭銘

劉文瑞

鄭時舉

譚維鼎

梁以蘅

羅兆鵬

潘大壯

許培之

何孟倫

陳吾德

何熊祥

吳應鴻

李翔 順德嚴球

南海陳杰

孫挺然

子應中

父文益 弟守謨

弟以麟 以麟子之

弟以麟 以麟子之

弟以麟 以麟子之

弟以麟 以麟子之

弟以麟 以麟子之

湯敬升

梁斗輝

勞養魁

鍾聲朝

李茂蓉

父本真

余士光

趙應元

黃貞

祖國賦

倫肇修

父大禮

潘起鵬

余士琮

子滋慧

林聯綬

易奇際

季子訓

陳璣

唐元楫

林枝橋

梁應材

劉大啟

區聯芳

容報國

何士域

何士垠

採藥者

負汲者

黃公輔

區志遠

鍾鼎臣

王興

以上新會

明

陳添佐新會人號月溪世居新會之陳衝自元至明初三世同居添佐至孝生五歲失怙與弟添佑育于繼母李值元季盜起隨母逃難為賊首所得母子不相見者十載添佐每思母歔泣下賊首憐而縱之復得見母于登名里之樓岡羈栖貧困採拾以為養者三載洪武初始與弟奉母還陳衝修復故業日增益之有先人舊廬四十楹良田四千畝新會志作四百乃築報本亭于祖墓立報德堂于所居之偏闢娛親堂于正寢之北自奉儉素而祭必極其豐養必致其樂邑令莆田薛彌充辟孝廉會添佑早世乃以母老固辭後以事謫戍遼海亦以母老懇祈于閩帥甫三載得代歸然未及家而母

沒矣初添佐在途聞母病戴星倍道既不及卽哀號入喪次
 饘粥苦塊終喪未嘗至私室間里以為難生平事親奉祭一
 遵家禮叅以義門鄭氏家規既又撮其要為三省九思十誠
 及家式百條以訓飭其五子俾世守之同居共爨延名士鄧
 林于家塾相其行禮林述其立身行己之大略立月溪孝義
 傳云李真祐者字械之南海人自少力學老而不倦洪武初
 有司辟為吏避居古岡微服為人傭人不之知也久之主人
 翁異其行延為塾師新會志云添佐延至其家相與訂作為家式百條及三省九思十誠文章豐迤宏博永樂間左布政使黃公亮將薦之會公亮卒
 不果未幾真祐亦卒自號扶搖子所著家式尚存據黃通志修黎貞字彥晦都會村人少岐嶷七八歲時與弟浴于塘弟溺
 塘井中雙指猶漾漾未沒貞亟沒水以手捉其足登淺處鄉

間異之少從父學于外歸從南海孫黃游故學所成就非一
 時流輩所及發為詩文自胸中寫出無斧鑿痕議論古今治
 亂興廢與世道得失人物賢否多自得之見洪武初補郡庠
 生八年乙卯以明經薦至京故事薦辟者赴吏部考乃授職
 貞托疾不往其見館閣諸公以禮相抗議論侃侃不屈諸公
 相顧謂曰國家禮文章創彥晦積學未可遽令遠去迺留商
 酌禮文兩越月始歸諸公歎曰堯舜在上下有巢由如彥晦
 者可易得哉相率餞于都門外部使者以其有學行署為新
 會縣訓導志不樂仕乃退築釣魚臺于所居宅前以事為訟
 者所誣適救鄉人鬪忤不直者中飛語戍遼東十八年新會志李承箕及黃清撰傳作居遼一十三年艱危困厄之中學愈博而識愈高氣愈充
 而議愈出聞帥禮之如賓洪武三十年丁丑赦歸聲聞益著

學者從之遠近畢至貞諄諄善誘訓以孝弟忠信隨其淺深有所造就焉以酒自放故號陶生晚更號稊坡學者稱稊坡先生陳獻章曰吾邑以文行誨後進百餘年來稊坡先生一人而已年五十九卒所著有稊坡集古今一覽家禮舉要行于世初貞在遼時孫普以事死貞抱持其尸以衣裹之殯殮如禮奉柩葬于安山之陽典衣營事為文祭之讀者莫不墮淚其自遼歸也適已薄暮明月滿空呼舟中餘酒登所築釣魚臺吟嘯久之乃扣門還家焉其胸次脫落類此

據獻徵錄黃通志黃

清撰傳廣州人物傳修

劉樂善山中人年八十餘以吟詠自適與趙伯貞輩相唱和

據西樵遊覽記修

謹案阮通志云樂善番禺洪武四年辛亥舉人官教

授見黃通志選舉表然番禺志不載又考東莞志薦辟中有一劉樂善為廣州教授豈即其人耶俟考今因舊次黎貞後存于此

梁臨字彥良沙國人羅蒙正弟子英華秀發工詩文洪武三年庚戌舉于鄉明年成進士賜宴中書堂賦詩有鼓腹愧蒙天澤溥願推餘滴遍蒸民之句一時稱之歷河南永城縣丞禮部主事卒明新會進士自臨始

據新會志修

鄧信字行甫自稱木石山人精詩畫及岐黃性孝友温粹削跡公庭居常布衣蔬食環堵蕭然不廢歌咏邑博蕭端升慕其人遷瓊教授以未相過索詩書一絕云散袖秋風老一株美人南去有詩無六年相問不相見夢隔城西曉月孤嘗過陶外翰題其壁云陶潛今亦聖之清五柳柴扉近市城秋思

滿天人欲醉碧雲屏裏一簫聲據金通志修

鄧彥良字希哲寺前人以禮自克凝重不遷姪林既貴猶嚴事焉同邑黎貞亟稱之洪武初以貢授清河縣丞有廉能聲遷廣西思恩知縣嘗奏知府徐授義推官張毅知事賀勉不法事民倚以安秩滿父老詣闕保留令再任改糧運于賓州人德之禮部侍郎寶安陳璉美其惠政民祠祀之入思恩名宦據新會志修

湯有容字載行下街人少年能文章勇于為義時輩多推服之洪武二十九年丙子舉于鄉會試中乙榜任廣西恭城教諭又歷興安聞兄死即日疏其情上聞棄官養母者七年母勸之仕于是復出官于容縣時縣大疫世謂疫能染人人莫敢出雖縣門無行者知縣彭清中其病熒然一身自分必死

有容日合家人具湯粥而左右之晝夜不離其側清得不死時人比庾袞處兄弟有容處朋友尤為難焉終唐府伴讀據廣州人物傳修

茹連字彙貞石潯人洪武二十九年丙子鄉貢初為齊府奉祠副改四川江安縣丞陞刑部員外郎出知湖廣長沙府連身體豐偉飯米數升豕首一枚然皆仰給公廩未嘗取于民律已甚嚴不受私託在京邸日有同鄉為縣令者邀連飲間誇其器之美連艷然曰君非盜民何以得此遽拂衣起人為之愧據黃通志修

鄧林字士齊寺前街人初名彝能為古文洪武二十九年丙子以明經中鄉選歷貴縣教諭南昌教授秩滿試高等成祖賜今名遷吏部驗封稽勳二司主事宣德四年以言事忤旨

謫居杭州學士大夫多從之遊後放歸田里卒林嘗自謂學

詩于陶章李杜學文于史漢韓柳學書于晉唐諸名家初無

所知名作懷春賦以寄意後官于朝大學士楊士奇祭酒李

時勉閱其詩文曰嶺南一代文人也自號退庵所著有退庵

集十二卷同邑有余慶者新會志云洪武時歲貢永樂中由監生知福

建南安縣莅官革奸弊均徭役修縣治興學校奏免崩堆海

蕩賸米一千二百餘石以復流亡秩滿去民遮道泣留如失

父母據廣州人物傳福建通志修

伍驥字宏道文章里人今新甯先世宋末有為典章者其後總

管士達仕元生驥年弱冠知大義兄騏以事戍遼海請代不

得兄弟執別路人為慟嘗歸自京師泊舟白沙澣夜半聞水

中有呼救聲亟起援之乃一童子詢之云父賴人全家藉沒

幸得釋還所沒攜吾母子三人附便舟還父病死中途舟人

圖財夜驅吾母子于江母與弟死水中矣吾以能浮得不死

然彼必來追復恐不免驥曰毋恐吾當為汝復讐黎明賊果

至給為已子墮水者酬以白金百兩出金以示舟中人利之

誘驥歸其童驥正色拒之隨以童詣白沙寨白巡官捕之賊

徒伏法其為義不奪于利類此平生積書多至數千卷一時

名士同邑黎貞南海王子倫胡濟番禺董匡皆受其延聘為

子師自著誠子文以十事箴訓諸子建祠堂築墓亭家規族

譜具有條理雖富甲鄉邑而儉樸如寒畯卒年五十九主事

鄧林志其墓又作輓詩云墓石恐無人秉筆贏金幸有子承

家蓋實錄也據黃通志岡州遺藁修

蕭嘉祐塘河人將赴舉禮部稊坡黎貞作構室說贈之嘉祐

再拜受教自是益力學堅忍其志以縱橫自用為終身戒後任廣西恭城知縣處事公平待人以信大得民心雖山谷犄犄以片紙招之聞風而至無敢後期者政暇與諸生講學士風大振後卒于官民作祠祀之世謂黎貞知人而賢嘉祐之能奉以周旋也據廣州人物傳修

溫琇字如玉白石人與鄧林為同門友永樂初以國子生知福建永春縣勸農興學均役平賦嘗減歲造皮張常貢士民德之調劇建陽同時同邑有李讓者字遜之亦以國學永樂

二年知浙江縉雲縣撫字有方多善政晉交趾原州府同知丁艱服闋補淮安府同知並見稱于時據八閩通志處州名宦傳黃通志修

陳璉字濟美別號完菴中樂石頭里人永樂中以明經授湖廣永州推官用英國公張輔薦調安南新安府推官會叛寇

楊恭僭稱王璉率兵到新安峽山縣與杜布等設伏擒之黎利父子叛成山侯王通戰敗傳檄以清化迤南城池與利所屬官吏悉令出城璉守不去竟遇害英國公輓之云漢廷決策棄朱崖歸國衣冠渡五滸獨惜匪躬陳郡理郊原誰為掩

遺骸據岡州遺稿修

梁繼灝字行素號澹齋濶頭人稭坡黎貞高第博學有行誼嘗以書授陳獻章獻章稱之曰吾邑以文行教後進百餘年稭坡一人而已余生也晚不及稭坡之門及長而與澹齋之子益游始拜澹齋澹齋誨余以稭坡之事縷縷此豈一日忘其師者耶當時在稭坡之門者不少獨澹齋傳其學教授羅山之下使弟子有所矜式焉其見稱類此邑人魯能吳韜鄺慈皆出其門著有澹齋集十卷子益登景泰七年丙子鄉薦

廣少不志 卷一百三十六
知興業縣著有未學詩一卷益子文任歲貢任衡山訓導皆能世其業

據黃通志修

林超字彥昇號樂澹北到人舉正統六年辛酉鄉薦授廣西北流令以邑不知小學建社學以養蒙以邑不知稼穡修耒耜以督耕由是博白陸川咸法焉徭寇薄城下設奇走之後中于讒闔邑士民赴當道上其功悟守袁秉衷申請兩院留之超力辭遂解組歸徜徉山水間人謂其似陶靖節云

據新會志修

蔣濬字希舜梅閣人正統九年甲子鄉薦積學能文尤工詩同年學士邱濬亟稱之成化初知福建晉江縣明敏勤慎務在利民獄非重犯卽遣之視地宜給民以鄉穀種教之播耕民蒙其惠名蔣家稻常祿外一介無所取秩滿遷漳州府同

知去任日泉民刻石于城南橋上曰愛民父母蔣公泣漳政如在泉時致仕後惟吟咏每出新意嘗與名士結詩社焉

據黃通志修

陳獻章字公甫白沙人父琮號樂芸居士生有異質髫齡能文善詩尤究心理學先輩多以遠大期之質羸善病著有樂芸詩一卷年二十七卒卒一月而獻章生宣德三年戊申十月二十一日也母林氏守節教育之幼警悟讀書一覽輒記嘗夢拊石琴其音泠泠然有一偉人笑謂曰八音中惟石音難諧今諧若是子異日其得道乎因別號石齋舉正統十二年丁卯鄉試第九人戊辰赴禮闈會試中副榜入國子監博覽羣書再上禮部不第從吳與弼講學居半載歸讀書窮日夜不輟築陽春臺靜坐其中數年無戶外蹟久之復遊太學

祭酒邢讓試和楊時此日不再得詩一篇驚曰龜山不如也
颺言于朝以爲真儒復出由是名震京師給事中賀欽聽其
議論卽日抗疏解組執弟子禮四年獻章旣出大學厯事吏
部文選司與羣吏雜立廳事下不少怠郎中等官皆勉令休
對曰某分當然也識者謂其抱負之大而克勤小物如此有
北士者數人約共往困折之及見忸然氣沮口噤不能發一
語因語人曰果異人不可狎也獻章旣歸四方來學者日進
往來東西兩藩部使及藩王島夷宣慰無不致禮其廬自朝
至夕與門人賓友講學論天下今古事疊疊不少厭倦成化
十年甲午參政伍僉事戴遺金欲新其居却不可乃營小廬
山書屋以處四方學者僉事陶魯遺田若干頃以爲館穀不
受十五年進士丁積爲新會令聞獻章名喜曰吾得所師矣

甫下車求執弟子禮于是教其治邑以正風俗成人材爲急
務廣東布政使彭韶總督朱英交薦召至京令就試吏部辭
疾不赴疏乞終養授翰林院檢討以歸至南安知府張弼疑
其拜官與弼不同對曰吳先生以布衣爲石亨所薦故不
受職而求觀秘書冀在開悟主上耳時宰不悟先令受職然
後觀書殊戾先生意遂決去獻章聽選國子生何敢僞辭釣
虛譽自是屢薦卒不起宏治初李承箕自湖廣來師獻章築
楚雲臺以居之三年春進士姜麟使貴州取道如白沙以師
禮見留十日去四年冬十月與戶部侍郎劉大夏泛舟厓門
建議立慈元廟于大忠祠之上五年增城湛若水請從遊築
江門釣臺爲講學之所七年巡撫熊達欲建道德坊力止之
乃築嘉會樓于江滸爲往來嘉賓盍簪之所冬慈元廟成作

碑文記之八年正月部書復至通判顧叔龍以兩司命來勸駕辭不就二月母太夫人卒九年按察使李士實以數百金買園一區于羊城却不受御史熊達欲建道德坊于白沙亦不可十年知縣丁積卒于官獻章爲建祠祀之十二年都御史鄧做林逋故事檄有司月致米一石歲致人夫二名却之獻章之學以靜爲主其教學者但令端坐澄心于靜中養出端倪或勸之著述不答嘗自言曰吾年二十七始從吳聘君學于古聖賢之書無所不講然未知人處比歸白沙專求用力之方亦卒未有得于是舍繁求約靜坐久之然後見吾心之體隱然呈露日用應酬隨吾所欲如馬之卸銜勒也體認物理稽諸聖訓各有頭緒來歷如水之有源委也故其學灑然獨得論者謂有鳶飛魚躍之樂而蘭谿姜麟至以爲活孟

子云其爲文主理而輔之以氣雖不拘拘于古人之繩尺故自有大過人者爲詩得李杜之製作而兼周邵之情思至于揮翰能作古人數家字山居筆或不給至束茅代之晚年專用遂自成一家天下人得其片紙隻字藏以爲寶儀幹修偉右頰有七黑子母年二十四守節獻章事之至孝母有念輒心動卽歸宏治十三年卒年七十三時給事中吳世忠方以獻章及尙書王恕侍郎劉大夏學士張元正祭酒謝鐸等八人同薦與二三儒臣入內閣柄用上敕吏部查勘命將及門而獻章沒矣卒前數日早具朝服朝冠令子弟扶掖焚香北面五拜三叩首曰吾辭吾君云卒之日頂出白氣貫天勃勃如蒸竟日乃息子二景雲歲貢生作小詩得唐人體裁景易邑庠生先卒孫三日田曰畹皆庠生曰豸萬厯初從祀孔廟

追諡文恭

據明史本傳年譜
行狀新會志修

張紳字書紳沙岡人父秋逕為黎貞門人負才名常從幕府
征交趾及遊京省有交州行稿金陵行稿藏于家早卒紳見
父遺書輒墮淚攻苦十年以明經司訓應天府正統九年甲
子領南闈鄉薦授湖廣沅江知縣邑有巨憝交結勢要武斷
鄉曲前官多瞻徇紳至絕不與交及犯法紳案其情撲殺之
其子訟于上闔邑士民共白其事上官益加重焉未幾歸講
學良金山下從遊者數千有司建書院居之邑西人文之盛
實由茲始弟紀領景泰四年癸酉鄉薦成化初拜南京監察
御史未至官卒紳子瑛登成化進士以廉能稱據新會志修
伍瑞潮陽里人景泰二年父安堂為峒蠻害瑞甫弱冠泣血
誓報讐及生子纔匝月即詣闕寫血章鳴冤得剿賊命瑞以

哀痛勞瘁卒于章貢途次暨賊平竟不及見也初將赴闕時

手植葵樹去後葵日滋茂風雨不侵人目為孝子葵後其子

孫泐碑葵所覆以亭邑人倫肇修為孝葵亭記據新會志修

楊英字廷傑仙洞人少以孝稱父喪三年不出戶景泰四年

癸酉領鄉薦母林氏羸而病日英焚香祝天母日復明相持

悲喜遂一意奉養不復仕暇則講學賦詩未嘗入公門鄰有

兄弟訟捐金求勝英諭以手足誼即引悔罷訟里人有貨權

貴子母錢者歿遺一子妻思鬻子以償英捐錢贖券焚之仍

給以粟子敷以藩椽考滿赴京泛吉陽湖下帆救湖中溺者

至銓曹銓部胡某詢白沙起居及其詩數默錄數百首以復

胡大異之問其家世贈以詩曰昭代江門惟正學海濱鄒魯

實吾師何人得似楊公子能誦白沙千首詩授南京留守司

經歷權儀真革匿稅弊補福州左衛經歷屯兵籌餉有備倭

功年九十無病卒

據新會志修

李渭字長源鹿洞村人少以事困于縣令遂發憤下帷不就
席者二年領成化十年甲午鄉薦又十年甲辰登進士授鳳
陽府推官善剖決時妖僧崔同兒蠱惑行奸大盜宣某巨惡
干紀並為民患渭前後寘之法民稱快焉仕終淮安府同知

據郝通志修

林紹光字一榮沙岡人少從陳獻章遊博通羣書得獻章律
呂之學成化間舉明經邑人御史鄧文憲少貧資而訓之傳
以律呂所著遂行于世士出其門者甚眾皆彬彬有白沙之
風督學林廷玉雅重之聘行射禮于各府故嶺南射禮自新
會始至今稱學行志古之士必曰林一榮云祀鄉賢

據新會志修

謹案阮通志云新會志有傳其選舉無林紹光舉明
經事惟成化七年歲貢有湯紹光為江南泰興訓導

者俟考

譚以賢字希聖父律字仲和成化十九年癸卯舉人任廣西
蒼梧教諭陞江西建昌教授性方嚴不容人過訓子弟雖燕
居必繩以禮祭祀執喪惟求自致人往見之不修容不敢進
有詩集十二卷以賢由貢為會同訓導著有玉峰集以賢弟
以良字士直少穎異通古文事親有禮由儒士領宏治二年
己酉鄉薦以親老不試遊陳獻章門學主靜行敦本實凡邑
中孝節亟為表揚同門李孔修湛若水咸推重之獻章于其
沒也弔之以文曰於乎士直遽至此耶天不與之年與之才
將誰咎耶彼碌碌者老無聞于世又何貴于年耶著有玉樓

稿二卷據新會志白沙弟
子傳白沙集修

黃子賢水南人以孝致甘露之祥而潔行好吟無媿白沙之

門云白沙弟
子傳

李翰字文卿宏治五年壬子舉人癸丑會試副榜第一教諭

廣西懷集除南直隸上海教諭轉北京國子監學錄陞北京

山西道御史未任卒陳蕭謂其操心律行風韻灑灑酷似吾

白沙夫子云陳遇夫白沙
弟子傳補編

區越字文廣號西屏潮連人父鑑字元暉有隱德嘗戒子孫

勿出息錢鄉人有鬪者為開陳是非多解去里有潮田歲一

稔鑑率眾築堤捍海為蓄洩法遂獲兩熟越八歲喪母哀慕

切至事繼母以孝聞從遊陳獻章舉宏治八年乙卯鄉試十

八年乙丑進士知浙江嘉善縣當入覲時奄瑾用事人皆載

重寶以行有郁生德越密饋金為之謀峻却之擢戶部主事

歷員外郎中委兌清江倉糧以廉著歷知建甯甯國府前守

喜峻法人人罪越廉知非辜悉為申理或以獄成不宜反越

執之愈堅卒無冤獄嘗夜寢覺大寒亟索衣出脫荷枷者曰

罪止小懲凍死其若之何擢浙江副使晉江西左參政分守

湖東平積年逋寇以老致仕卒年八十七所著有西屏集六

卷長子元履弋陽教諭季元晉登嘉靖四年乙酉賢書任雲

南鎮南知州晉福建興化同知初發科時甫弱冠以父解組

南還遂決志終養父歿築廬墓所朝夕哭拜年踰五十始受

專符所至著廉名有見泉詩集十卷據新會志白
沙弟子傳修

張璧光字純卿凌涌人從陳獻章遊領宏治十七年甲子鄉

薦事親孝母黃九十二歲每食必親供初任浙江慈谿知縣

俗多淹女光立保甲嚴禁之所活甚夥改廣西懷集縣政務勤民城池橋梁之役捐俸以時修之民德焉居家屢請鄉賓年八十有一卒據郭通志修

易龍字體乾坡山人今隸新甯博學強記性操端潔以宏治十四

年歲貢為郴州訓導新會志及鶴山志其教人先明義利徐

講古禮以維之州人郎中何孟春亟稱曰吾黨弟子知根本

工夫未仕而行已治家可觀君之教也艱歸喪祭盡禮率其

族建祠堂作家訓立宗子以統祭祀常曰宗子不能修身庶

子不敬宗子皆為不孝從子達由新甯學正登正德丁卯科

鄉薦事之最謹達後知湖廣桃源縣服闋補汀州府學訓導卒據新會志修

伍雲字光宇南山人少獻章七歲系出汴梁伍氏先世仕宋

為嶺南第十三將曰岷之子始來新會世為士夫家自少軒

整有志于世無所屈讓與人語惟其所欲必竭乃己人有善

好之若出諸己已所欲為必強人為之垂四十始交于獻章

獻章所可雲亦可之獻章所否雲亦否之南山有石延袤丈

餘下可容一榻光宇築為石室旁樹松竹時往造其間危坐

收斂為持敬之學地濱大江雲以意為釣艇置琴一張諸供

具其中題曰光風艇遇良夜皓魄當空水天一色雲乘艇獨

釣或設茗招獻章共啜雲悠然在艇尾賦詩傲睨八極獻章

亦扣舷而歌仰天而嘯飄飄乎任情去來不知天壤之大也

所居之北為巖亭高不盈一丈其中闐寂視之窈如也而雲

之夙疾未除齒髮日耗其為學也蓋不能無日暮途遠之憂

杜門息交凡平居一切與往還者皆抗顏謝焉入處于亭焚

香正襟趺坐竟日聞者異之別于白沙築室三間獻章題曰

尋樂齋獻章曰光字至則商論彌月而後返用心良苦時人無有能窺其際者惟寶安林光與予知之予交光字最久光纔一見退謂其弟曰伍光字君子人也其相賞如此勵志甚切每厲聲語曰雲不自樹立為人不如死嘗告于季父絢洎伯兄裕割田若干畝以供祀事權以所居第為祠有事必誠必敬朔望率以夜半起衣冠端拱立祠下以俟尊卑男女咸來無敢不虔後始營材為祠當病亟時尙經度茲役卒之前數夕焚香秉燭招獻章與訣卒年四十有七無子兄裕以其次子秉中為雲後孫佳郎字拔干少補諸生事父至孝父好文喜客樂施佳郎承志無違順治戊子大飢捐所積倡有力者以賑鄉里賴存活者數百人足蹟不履公庭惟執經課子暇則栽花種竹彈琴賦詩以適志築室雲沁山中宅邊為紅

蓼洲芙蓉城醱院柳汁池浴蘭亭南湖別業備林壑之趣

嘯傲其中悠然自得一時縉紳先生讀其詩文雅敬重之所

著有浴蘭亭草釣槎近草寶蓮草四書正解卒年七十八學

者稱為孩只先生子仰曰康熙十一年壬子舉人雲同邑又

有黃佐字希顏工詩文成化十九年癸卯舉于鄉仕廣西太

平府推官白沙贈黃希顏春試詩北風雨如注是底別離時

期去去江流疾還君一贈詩又贈之太平推官詩有林棟陳

官五馬後無官百揆前不將前後看須著有無言陳魁白沙與書曰昨望見生

嘗曰所居之旁伍雲鍾淑林棟陳魁龍鍾如東田老人稍就

此其人皆可與遊而今亡矣陳魁龍鍾如東田老人稍就

之疲頓與石翁異者幾希然與之論舊事寫平生于我三沐

三薰之愿愿猶是也惟日孜孜斃而後已生與我皆然復何

道陳謙張詡曰先生精神嘗與神通居皆獻章弟子而陳魁

哉陳謙外海陳謙宅有異人來見云

事獻章最久云據新會志白

周京字文都麻園人幼孤事母兄以孝友聞成化十三年丁

黃州府志卷二百二十六 列傳十五

西舉于鄉以母老不遠遊築曝日臺習靜其上正德戊辰銓

授應天府通判廉明公愼吏畏民懷卒于官後報擢治中

贈文都詩小住江門五十年隔波潮應荷相連窓開四面客

通刺酒覆三五月到船身上紫袍知有相畫中碧眼亦真傳

明朝庾嶺高回首子必誠幼侍父入京白沙亦贈之詩還著

萬里晴波正接天子必誠小坡隨長公天葩未吐孝經通青

雲氣魄蓋人雄曲江清獻鄉先達敢道後來無此風

德十一年丙子鄉試仕至衡府長史據白沙集

容珪及其弟球與羣從兄弟珽等事陳獻章最久皆早卒獻

章亟稱之獻章有容球來訪詩問我何如十載前不相假所適

詩一師友道久衰窮鄉無可者是非真妄間彼此不相假所適

之終身有贈容珽詩翳翳峰頂木裊裊峽中溪下有飛古寺

在陶治有贈容珽詩上哀猿啼我昔經過日登臨上扶藜

中流日黯黯兩岸風淒淒遠行會離索四顧仍低迷又容彦

羨子意氣豪別我無一悽行行至斯峽為我試留題又容彦

禮率諸弟同在館下彥昭彥禮彥貞相繼而逝彥潛又卒獻

章感而有作疏後進君家兄弟散朝烟兩峯

禮在諺昭嘗遊永豐山莊定山浦彥禮碑詩久未鐫

刻墓銘莫道江門空識我千秋遺話及璣璫

原韻山樓歌耿夜燈然誰借東良一日船淚逐花溝因暮雨

瑩次若將昭穆定獻章又有祭彥禮文奠容彥昭文奠容彦

九原新兆有東璿

潛文與容彥文書答彥文見訪詩據白沙集

謹案阮通志云諸容氏彥昭尤顯蓋嘗為羅倫所賞

故有送三峯歸南海序之作應即容珪之族所謂諸

容者非耶今考明新會志及陳遇夫所編白沙弟子

傳俱失載

易元字德元為郡學生有文名嘗謁羅倫于永豐倫贈以南

海三峯記謂南峯德元東峯秉常兩峯容彥昭也據白沙弟

文集

馬廣生字元真號默齋獻章之友子國馨姪貞同遊獻章之門嘗相與作均田法以祀其兄之無嗣者獻章嘉之書其後知縣丁積稱馬氏處家有禮讓之風均田一事可法于後世勉之以詩有喜見林中有俊英之句獻章與馬貞書曰貞父不幸早世貞卒成立貞有母也有母而無年貞之不得于天也奈何奈何獻章嘗飲馬氏園有贈童子馬國馨之作據白沙弟

子傳

湯雷字民悅號九山祖和字清軒少穎悟言動有度成化歲貢入成均祭酒吳儼甚器重之知瓊州定安縣多惠政丁內艱服闋入都銓掾索常例曰我只飲定安一口水安得常例哉遂拂衣歸年八十二卒雷與兄雲弟霓皆從陳獻章遊嘗延獻章至其鄉八仙井山中講學與湛若水友善時鄉射之

禮久廢宏治十八年知縣羅僑聘雷及諸生譚以賢林紹光等損益禮儀器具器及樂習之正德初提學林廷玉至縣觀射賦詩命雷等遍教各郡嶺南鄉射自此始年七十尚以詩寄區越自悔進德修業之遲後與若水改葬陳子若水因留雷家為雷兄弟置田百畝而去據白沙弟子傳廿

黃球號元海聞陳獻章倡道白沙由新會城南徙居白沙之陂頭就學焉子子正號梅所能繼父志獻章嘗尋梅陂頭有詩與之得隨處體認天理之旨雖微至涸池蝌蚪鳥雀爭食日令童子逐鳥雀汲水灌注以遂其生其仁可知矣壽九十孫孚字容伯號鳴鶴弱冠補諸生究心理學學慕獻章數館其鄉多辯析白沙詩非註義可到踵門而學者屢常滿以恩貢授昌化訓導正身以率之遷閩德化教諭曰儻教化或虧

非德化矣告老歸年七十三卒卒之前日曰孔朱陳子皆七十三季幸不得罪于前喆足矣所著有太極匙性理真筌白沙遺事各一卷雨化集象谷詩稿共四卷涪字鳴谷登隆慶元年丁卯鄉舉萬曆八年庚辰進士授甯海令下車新方孝孺祠堂以崇教化會有履畝之役躬巡阡陌吏胥不敢奸時府鹽捕有螫民為奸利者涪置之法主者忌之涪素工畫縱筆作樹石危峰出尋常蹊徑之外當道聞而索之涪應曰罷邑救過不遑遑及畫哉竟以此得罪謝病歸三十餘年闢洞鳴山構定帆亭咏歌其中閭里飢輒白當事發賑嘗築外城邑人賴之晚年自稱六柳先生與舉人李以龍修縣志所著有鳴山集厓山志李杜或問諸書壽八十五據白沙弟子傳新會志修陳瑞字德貞性豪邁不羈善寫雲煙山水成化中馳名藝圃

至京師授直仁智殿錦衣衛鎮撫漫筆為希夷騎驢圖益精絕後師事陳獻章力于學嘗以非其罪望名縲紲獻章救釋之後逆旅樓中客有議白沙之學遂力辯之大呼墜樓折肱其篤信如此據白沙弟子傳修

何述字宗道龍塘人少穎悟有志正學以名節自勵天順六年壬午鄉薦第二人歷容縣教諭柳州福建教授造就有方士類德之聘分考江西有以重金求入殼者述正色斥之曰天地鬼神其可欺乎及歸構室山旁日進諸士講學不輟與陳獻章友善獻章過訪有蘇公道口雲連海宗道廬前雨滿山之句扁其堂曰斯民卒之日獻章為文祭之據新會志修

余諒字以貞父復永樂初征交趾役民餽運多道斃時叔當行復請身代卒無恙歸人多稱之諒登天順八年甲申進士

以丰度端凝特授南京御史三署都察院事革進御隨天鵝等諸異品畿民德之晉福建按察僉事革屯糧歲例千餘金與邱濬校議家禮儀節刊行所部晉湖廣副使居官十有八年清操如一日迨歸悉讓故業諸兄弟姪自居蘇溪與物無競嘉靖二十五年祀鄉賢

據新會志修

魯能字干之其先自涇來隸尺籍景泰元年庚午鄉薦五年甲戌進士除南京戶部主事丁內艱服闋改北京戶部擢員外郎進郎中歷任踰十年司無滯事尚書牟富楊鼎咸重其才時部官至正郎者多拜布政及參政能年深乃得陝西參議或以為惜笑曰人臣當務盡職豈暇計資級哉成化十四年進右參政十六年進右布政使十七年轉左關陝重地聚戎馬十數萬控制荒逖糧餉百需皆取給于藩司又直邊陲

多事內地水旱相仍能為佐貳時日事巡歷凡西北儲峙多寡兵馬強弱皆心憶而口數之既總司事創會計堂出納損益咸得其當自是邊儲有備而民力不困歲所給糴米銀數十萬舊乾沒于權要悉革之甲辰大饑公私罄竭計無所出朝遣大臣賑濟行一切權宜之政能隨事裨補多所存活癸卯述職至京考為天下最明年擢都察院右副都御史巡撫甘肅時父已年近九十遣家屬南歸侍養獨攜一僕自隨甫下車制置事宜十條曰新號令謹練習修城堡明賞罰覈功實抑虛詐恤孤寡稽儲積行賑貸撫蕃落令下軍民驩呼載道三閱月而父訃至軍民赴闕乞留不可得哀毀踰禮比代至病已篤歸至會城卒年五十八能性温厚慎交遊不談人過至論公事則侃侃不回卒之日囊中惟餘白金三十餘兩

祀鄉賢

據廣州人物傳郭通志修

余統字承之厦村人成化二年丙戌進士授行人遷南京監察御史疏乞均用材抑奔競糶陳糧併殘伍禁宿弊修國學前後疏數千言皆切時政有奉使者寄孥而行統避居僧舍俟其使還乃偕入其持操類此卒于官

據郝通志修

陳經綸字汝學

陳元輔裔孫

澹灣人少穎悟弱冠領成化十九年

癸卯鄉薦第一二十三年丁未會試第三人觀政禮部纂修成化實錄以採訪事實奉使廣西暇與士子講易一時宗之尋授南京戶部主事以事忤權貴謫象州同知至則撫定獠民修學勸教撫按疏薦之卒于官所著有寒泉遺稿六卷

據郭通志修

余敬字行簡宏治三年庚戌進士知潯浦縣修學築城訟清

盜息徵拜南京御史嘗因天變奉詔陳言乞黜不職罷不急

舒民困清戎伍等事丁憂歸遇副使歸善姚祥卒于途敬殯

之而歸其喪及服闋以病不行卒于家

據郝通志修

易之教字湛許坡山人以儒士補諸生既謝去從湛若水遊得隨處體認天理語終身自敕執父喪哀毀骨立時祖父已耄日障乃忍死謀奉甘旨不倚諸父既而母病日夜不解衣叩天默禱願以身代後策杖求墓地葬父母及祖父母月必沐浴遍展拜揮涕而歸弟子從之遊者繩以禮而後訓之多成立孫文炳以髫年舉于鄉引溫公少年登科語戒令閉門卒業無與外事先塋常被侵涕泣以請其人感悔還之匍匐助鄉族喪葬惟恐後書座右曰存光明正大之心為光明正大之事里名居仁大書孝弟忠信禮義廉恥并善惡可勸戒

者于衢亭年七十九將卒語子孫曰忠孝立身之本勤儉持家之本寬厚處世之本論者謂為名言據新會志修

李文明字朝光鹿洞人宏治十一年戊午舉人初任湖廣衡州通判有運糧領兵築城賑飢之功時朝廷有事乾清宮文明督運材木有羨餘銀四百悉歸之部以憂去服闋判湖松兩府理徭賦以清介聞遷福建甯同知居官三載以疾致仕卒年八十一據新會志修

鄭銘字克新許坑人登宏治十八年乙丑進士會纂修孝宗實錄執政聞其博洽命往滇南網羅散失銘徵採纖悉靡遺還授戶部主事催餉德州軍民稱便歷郎中出守袁州修城飾學百廢漸興袁俗嫁女率傾貲產之半故生女多不舉屢禁莫止銘為定上中下奩嫁之式奢者以僭論令行遂無溺

女者又俗多火葬銘痛諭之皆憬然悔悟旋解組歸士民思之勒石宜春臺上銘與同里區越平居以孝稱事繼母均得其歡心白沙陳獻章兩作慈母詩遺之子時舉別有傳據新會志修

陶益字允謙三廣公魯之孫宣威將軍梁民子也性聰敏博涉強記研精書法尤粹于易終日端默燕居無惰容事寡嫂倫氏如母與青蘿王漸遠鶴門關于政講明理學嘗夢白沙而學益篤就正于湛若水若水以肫醇淵摯稱之構樾塾書屋講學其中一時好學之士從若水遊者輒命之就見務躬行不虛談名理或勸之著書謝曰大道目擊而常存至理反求而大備陸九淵云六經皆注脚也又况濂洛關閩闡晰無遺乎但願諸君體驗力行而已以明經授江西訓導日集諸

生講獻章之學立考德問業簿以稽勤惰課督無虛日士之貧而好學者出俸給之如劉朝璽等後皆為名臣復以居鄉時教養賑濟之法施于永新撫按交薦部檄內轉以目疾力辭歸永新士民祠于名宦年八十卒臨終戒子不得請入鄉賢及卒縉紳以為請其子絢以遺命力辭

據新會志修

劉文瑞字廷麟邑城人正德六年辛未進士授行人奉使占城賜一品服事竣擢刑科給事中時帝屢巡幸文瑞抗疏請回鑾言皆剴切其略曰臣觀聖意所欲巡幸者自遼東宣府大同延綏以及甯夏甘肅至于河南山陝諸省南北直隸皆遍歷而後已遼東迤北地近戎夷土寒不生五穀軍民類多罪徒一有邊警挈家逃竄其窮苦可知矣况宣大二鎮數經駐蹕今復繼往民何以堪河南山陝與南北直隸水旱相仍

寇盜竊發民之凍餒而死者不可數計逃亡從賊者將逾半矣災害既慘今復騷擾民將何所控訴哉詩曰天命降監下民有嚴書曰民罔常懷懷于有仁民心既怨天意亦怒不能懌矣陛下聰明勇畧超出天下夫何念不及此耶且前日應州之捷人皆知陛下躬冒矢石所致及論功行賞則從征之人有進秩一級者有超陞二級者有加祿米賞金帛至于陰子者且又有不經戰陣不與參謀而亦冒受陞賞者矣陛下所得特加公爵之祿耳以天子之貴享四海之富而乃加公祿亦何謂哉茲者聖駕又欲遍歷多方以耀武功臣竊以為無故輕舉殆非長策就使成功亦不過為將士謀耳儲位未計府庫空虛民窮盜起災異迭見正當修省而猶結怨于民臣竊為陛下不取也不報時正德十三年三月也十五年擢

湖廣僉事抵家卒文瑞為人樸厚慷慨甘于貧乏卒之日殮

葬不給云據新會志修

李悅字子喜新會志字子善盤溪里人天性孝友年七十言及父母

輒流涕長兄七子二十餘孫產薄不能自存召與同居以已

財產均之旅人來依至百餘日庭無間言所居臨海颶風作

棺骸漂集悅皆收而葬之新會志云今龍盤山列冢是也同邑李翔順德嚴

竦俱以孝友稱翔字舉南湖連大燾人正德二年丁卯鄉薦

嘉靖二年癸未進士授衢州推官留家事母攜一僕以行凡

事有裨于民者必堅持之動忤當道不變鎮守太監虐民翔

手鐵如意擊之于座羣小震聳浙人呼為李鐵尺按察副使

潘曰者婺人也婺與衢地接曰弟昂與衢民郝冉婚媾有年

矣冉後貧昂欲悔之曰助焉以牒授翔翔執不可在衢三年

蕭然獨處惟敝惟一奩破篋二楮圖書數卷而已與副使朱

裳仁和令李義壯號三清按巡御史王潢雅重之尋擢刑部

主事欲改南迎養或止之翔曰老母年九十四近思之夢魂

顛倒矣遂請歸抵家七日而母卒人謂孝感起補戶部員外

郎晉郎中陞福建邵武知府屬縣內社各立學學數十區第

子繫籍者凡幾千人文教大興然翔性剛方不能善事上官

有僧繼圓者罹法當死直指包節右之改成南丹且檄守發

遣翔對曰凡僧問成例行原籍追解以便他日勾稽無就寺

發遣之例包不悅謂其倨傲無禮翔聞笑曰吾棄此官如敝

屣耳遂挂冠歸嘗推明性命理氣之原闡所獨得多先儒所

未發學者尤尊稱之所著有似說閒稿各一卷嘉靖庚申巡

撫陳大用題祀鄉賢竦置祀田捐產繼兄邑旌焉據郭通志修

鄭時舉字一鵬銘子正德十一年丙子舉人嘉靖間知泰甯縣以清儉聞先是令丞簿尉薪水悉屬民供歲不下千五百金時舉悉罷之陞道州丁父憂起補海州遷南甯同知著有

鄭氏家乘三卷

據新會志修

容瑞字廷桂河塘人性質魯仁孝早失怙每奉遺物輒泣不已盜火其居遺物獨存其孝感如此事母尤篤歲貢至京以母老陳情終養母喪復入南監祭酒費家尚書湛若水交薦嘉靖初廣東布政使李中以聞詔旌其門後授遂昌主簿公勤廉謹愛民禮士時南海有陳傑者字汝荷以孝行稱舉人龐嵩等舉之御史姚虞督學蕭鳴鳳並旌焉

據郭通志修

譚維鼎字朝鉉天河人領嘉靖十九年庚子鄉薦第一筮仕同安時倭寇及饒漳飢盜千萬環瞰孤城維鼎請減弓兵銀

以甦疲困築土堡練鄉兵多設間牒令自仇殺凡先後奪回擄口並降活者數萬人晉泉州府同知委修莆堤費省隄固莆人賴之會寇犯仙遊諸邑大吏檄維鼎與都督戚繼光討平之功上賜鏹幣贈父母如其官晉都督府經歷尋擢廣西左江兵巡僉事減兩江商稅改力差為僱役出所撰小學解令民習之忠州土官黃督相占據四都維鼎使典史李材擒之增秩本道副使督剿古田謝病歸卒年僅五十同甯閩甌間皆建特祠維鼎居家視弟維鼎子如己子置祭田恤宗族里閭高其義

據新會志修

黃龔字金卿路村人性孝友年十七補諸生父終寢苦枕塊不茹酒肉者二年嘉靖二十二年癸卯領鄉薦及母終守禮尤篤事兄碧猶父選知普安州興學育才化土官抑安氏革

應付民愛如父母晉廣西慶遠同知改知雲南和曲州往返
普安百姓攀留至不得行抵家兄碧逝哀若喪父均俸諸兄
弟不自私云據新會志修

梁以蘊字仲房橫嶺人性孝友弱冠以貢授賓州訓導嘉靖
二十二年癸卯領廣西鄉薦第三人轉廬陵教諭歷紹興府
教授士貧不能婚喪者資之二十八年聘山東考官餽饘郵
傳悉卻之自買舟行聞者嘆服擢連城合革里甲供具聽訟
常從未減至吏胥有犯毫不少貸稽核版籍里役逃亡以富
室補之逃亡咸復業修奎文殿葺學宮恤死刑置義塚年未
四十乞歸養連城祀名宦陳鳴祀之鄉賢據新會志修

林大章字文經沙岡人年十三見知督學吳默泉嘉靖二十
五年由舉人授江西東鄉知縣修學興教催科有方民爭早

輸不阿事權勢嚴嵩當國鄢懋卿用事直指徐某檄縣取金
二百為餽大章誤留其檄竟以此見嫉給諫徐良傅移書曰
公仁心惠政方爾淪洽而畏途險巇如此真可太息然于公
奚病清泉白石信步皆樂惟為道自愛耳大章歸後弟大芳
亦領鄉薦兄大積尚老諸生乃悉以父所遺產讓之又割田
以供先祀戚屬嘗有恩者皆厚報之僑居西郭不至公門遇
建外城諸大議則身先之必成乃已其孫挺然為諸生性端
介有祖風據新會志修

羅兆鵬字少南古勞人嘉靖二十八年己酉舉人選長樂縣
教諭起廢裁競士習以正擢知長泰縣修良岡書院以課士
埔邊塘田為要官所斂鵬舉判歸之民甯洋為盜藪首議建
城身任其勞遂成巖邑督撫汪道昆譚綸直指李邦珍陳萬

言薦諸朝加秩移治甯洋而向之要官讒之乃歸二邑各祠祀之歸後聞里有宦女媵武臣家厚贖而歸其母女後為貴

顯婦云據新會志修

陳試字惟功外海人嘉靖二十八年己酉魁于鄉授臨桂教諭主貴陽書院諸生翕然嚮風遷會昌知縣劇盜犯城悉力捍禦彌月賊解去會援兵敗于賊試以不救罷朝議謂試有保障功起補臨賀賀邑小供億煩試釐奸蠹均徭役稱畫一焉富川有訟殺人者司理誤坐拷死相繼御史下試覆審試竟雪其冤司理銜之時邑有水患蕩析民居甚眾試撫恤流移先賑後聞直指旌之卒以讒免官子應中萬曆四十年壬子舉人改名中生性剛直授湖廣石首知縣忤權貴解組歸值間寇劉香犯廣僉疑總督熊文燦召寇中生作水激石鳴

行斥之其不畏強禦如此復以海蛋為寇力陳剿撫鄉人德之為建報恩祠據新會志修

潘大壯字健行花園巷人領嘉靖三十四年乙卯鄉薦隆慶二年戊辰授臨江別駕值郡飢攝清江捐金實社倉日坐郵亭粥餓者請廣郡科取士額復攝新淦汰省供張及革運米歇戶磴戶船戶諸弊攝新喻不煩政令惟課諸生式異行而已太史西清張春賦以詩云談文四座滿無訟一庭空聞郡帑失金輒還有旨聽調郡人攀轅不得行庚午補大理府別駕抵郡悉絕饋遺設策捕茅翳中盜有礦官恃臺中人與援貨礦民錢橫索息恟恟將激變大壯盡法繩之民始安署曲靖關西嶺隘建迷渡市橋為臺中所中罷官少府嚴淮賦以詩曰未將鼎力支天地直有丹心泣鬼神歸事親盡歡推

故田廬予其弟子之佳萬歷二十二年甲午舉人歷任南平監利二縣公明善斷課士外無餘事翁正春賦以詩曰四野桑麻無犬吠一庭烟雨狎鷗眠人謂父子俱以詩爲實錄云

據新會志修

李積字惟成河塘人家故貧力學自致初爲南海諸生督學張希舉命子受業凡三年慎出入言未嘗及私張甚器之嘉靖三十七年戊午領鄉薦里有富子毀橋石有顯子欲逞志焉壽張其詞積曰第令修復已耳豈囂非厚道也顯子慚而止四十年選陳州學正署項城訟民持數百金求直輒斥之以理斷決隆慶元年晉知涉縣縣當孔道民貧土瘠供張日煩積一意撙節貴人過之弗悅亦弗恤以母喪歸無資侍御鍾繼英助之乃得歸痛母骨立服闋卒

據新會志修

許培之字曼植容穀巷人性溫厚領嘉靖四十年辛酉鄉薦授福建永安知縣邑地分割于大田甯洋戶籍空虛富豪占射培之摧梗招亡嚴清審察市井安集晉興化通判建倉便輸署莆田築裏海堤成護田數百頃後祀名宦再晉廣西養利州政聲益著以親老辭歸子鉉時萬歷二十三年乙未舉

人據新會志修

勞守謙字光仲古勞人父文益嘗還人遺金謙少穎異甫弱冠登嘉靖四十年辛酉鄉薦任桂陽學正以身率士惠貧者以俸萬歷元年聘雲南同考御史舒念亭察其行履附疏薦擢知廣西藤縣丁內艱起補馬平縣勤政恤民中武弁讒歸族人私售嘗田獨力贖還在考官所得欽賞金貯穀以防飢立家塾令子大臨訓里中兒不入束修里人咸德之弟守謨

廣州府志

卷一百二十六

列傳十五

三

亦以學行名

據新會志修

何孟倫字慎明河塘人嘉靖十三年甲午鄉薦二十年辛丑進士第三人授鄞令改知建甯縣守正不阿扁其堂曰節愛凡有利于疆圉士民者一一具舉時稱賢令云復令新昌擢戶部主事郎中推浙江副使未至卒自號蘗樵所著五代文選註十卷八代文彙十卷餘閒剩語等書

據福建通志新會志修

李以龍字伯潛務前人號見所性至孝領嘉靖三十七年戊午鄉薦戀母絕跡公車與弟以麟潛心理學嘗讀陳獻章詩文有省因博求理學家言得薛瑄讀書錄遂合諸賢語錄手自編次曰省心錄以時觀察其學以居敬主靜為本年九十

一卒所著有寒窗感寓集又有進學書師說行世崇祀鄉賢弟以麟字應叔號滄澣為邑諸生慕白沙之學署其軒曰敬存手編宋儒格言研講不輟尤工書善畫為世所重以麟子之世字長度號鶴汀少有逸才亦工詩善書間作雲林山水皆清絕少保朱燮元時為督學名人倫鑒所拔士皆至卿相見其文曰霍湛而後為嶺南生色者非子而誰萬曆三十四年丙午舉于鄉數奇不第嘗與番禺韓上桂道淮謁淮督尙書李三才李未及見遣以數緘兩人留使者坐立裁報章駢麗典則章入李亟延見贈三百緡曰幾失名士晚年始就瓊山教諭遷池州府推官未幾移疾歸所著有龜山副藏剩水山房稿息廬詠小草北游草南歸草家園草水竹洞稿朱崖集行世

據岡州遺稿鶴汀集傳新會志修

陳吾德字懋修外海人嘉靖四十四年乙丑進士授行人晉工科給事中條陳廣東八事帝皆從之元日日食勸上修省

語甚懇切元夕命作鰲山遣中貴人織衣浙江亟疏諫得報
罷復力論採珠病民忤旨削籍萬曆初起兵科給事中中旨
以內官鄭真傳兄子為錦衣吾德抗疏力爭復論都御史劉
壽不宜召用并劾罷禮部主事宋儒兵部主事熊敦樸會成
國公朱希忠薨求贈為王上書爭之大忤張居正意遂出守
饒州有惠政居正憾未已因王府被竊坐謫馬邑典史御史
張簡承風旨論吾德違禁講學又削籍居正沒復起遷思恩
推官寶慶同知以親老皆不就親沒起補紹興同知遷湖廣
僉事平巨寇劉汝國等上功賞鏹幣無何卒於官著有謝山
存稿十卷甲子厯年圖一卷律呂說四卷祀鄉賢據張府志修
黃尊以掾吏滿考將授職有才畧嘉靖三十三年倭犯蘇松
兵部郎中吳一瀾奉檄至廣州募兵尊慷慨應募得良家子

二千率以行與倭戰于三墩設伏出奇勝之再戰於蕉樹墩

又大勝之前後斬首數千級倭寇為氣奪復遇寇於得勝港

口後援不繼力戰死兵部移檄給祭復其家時有小校伍維

統同往以功授廣海衛百戶據張府志修

何熊祥字乾宰河村人萬曆十六年戊子鄉薦二十年壬辰

進士選庶吉士改御史舉止嚴重寡言笑初按上谷兼督學

政課士飭軍精彩煥然軍苦積逋多逃疏奏豁之時言利者

請開採柳溝口幫水峪團山諸礦熊祥抗言山當陵寢正脈

何敢搖動萬一有他誰執其咎議遂寢再按閩首劾撫臣侵

牟關藩餉又奏罷礦稅閩民大悅先是中丞李材以講學見

重撫滇時為蘇御史誣奏戍閩有年為特疏申豁尋按三吳

疏請信詔旨以安人心時三吳權稅視他省獨苛既罷矣權

廣州府志卷一百二十一
瑞傳密旨復權因有是奏權瑞悚息又奏免御額六萬旱澇五十萬夙逋金花六十萬皆人所不敢言者吳人德之轉按南都七郡奏免稅券十五萬有稅監欲併織造權疏糾其奸天都吳宗堯為陳增膚愬下詔獄虎冠者橫起視徽郡為利藪蔓延滋甚熊祥為申理疏凡十餘上語極剴切奏可故事御史六年秩滿得京堂祥九年乃晉太僕又九年始陞大理卿人服其恬拙尋遷南少司寇謂兩京慮囚僅有執審一路久之不舉瘕死無算因疏請力行之末減甚眾會南京吏戶禮尙書俱闕祥兼署隨事補揀措置得宜擢南左都御史兼署兵工二部尙書有考功郎為建言子孫陳乞議覆幾罹冒濫之禍疏力援之得蒲禮有臺臣糾諸大臣溺職語多矯激上怒削逐疏馳救之得賜還海忠介名雖易而嗣未廢特疏

請之得廢子諸所建白皆政治安危攸繫者尋晉南大司空戎器戰艦辦集若素晉南冢宰掌京察進退賢否一秉虛公無所徇撓旋以親老陳乞得旨予告侍養十餘年始終以簡肅銘座右熊祥父上新嘗題簡肅二字為家學云卒年七十六贈太子太保諭賜祭葬諡文懿所著有四巡疏鈔六卷南都疏畧三卷馬政事宜平刑八義共十卷

據新會志修

陸象賢字肖靜小橋人少孤母蘇教之領萬曆四年丙子鄉薦教諭程鄉督學陳鳴華稱為人倫師表擢福建松溪知縣礦使開採調停有方民賴以安考滿以拂撫軍意罷歸居鄉族立規約設祭田族有不足者隨力為濟環堵蕭然晏如也縣令王命璿稱其高風未幾卒聞人魏濬為嶺南僉事謂遺愛在吾邑為文祭之

據新會志修

關世教字維化談雅人資性敏異精心易傳多所發明中萬
歷十年壬午舉人時珠盜旁午姦宄赴軍門告密詐嚇富人
世教條其害陳之事獲禁息三十三年乙巳登禮闈乙榜授
江右清江教諭轉補南城日與諸生講學益王暨世子郡王
胥敬以賓禮稱為江門理學正派遷杭州通判署府事歷署
昌化於潛臨安咸以廉明仁恕為治時杭之稅璫暴橫酷拷
平民十三命置土窖中命垂絕世教出之得全活杭機商欠
貢上生絹二萬餘連年逮追商死妻子姻族瘐死者無算世
教釋之坐奪俸杭之人肖像尸祝以終養歸七膺鄉飲壽八
十三卒同社稱為貞白先生鄉人置主東亭驛配食于社崇
禎八年祀鄉賢

據新會志修

吳應鴻字鳴漸邑城人萬歷十年壬午舉于鄉戊戌授松江

倅同銓有掣梧州者應鴻舉以相易太宰大噓曰松故名郡
若舍而就梧何也應鴻告以母老太宰竦然梧故有權務主
者多私奸胥藉以侵漁應鴻一湔宿弊巨憝邱大用與胥徒
相倚為奸應鴻廉得按以死尸諸衢郡有墉之役役者畚土
範磚未就陶而大雨土釋不可火費公家金錢無算當事者
泥文法相踵斃應鴻設法釋之狼兵歲冒餉不貲應鴻立分
條法逐隊查點虛冒為清攝北流邑幕故墨甚餽以金立召
還之幕懼解去以母喪歸適礦稅事起內充使分道四出使
廣者為李鳳陰籍富人懦弱者中以匿稅法邑令鈕應鴻與
鳳黨結指使繫良民四十餘家百姓赴愬纍纍應鴻以群情
洶洶恐生他變偕孝廉梁斗輝鍾聲朝勞養魁謁鈕備述百
姓搶攘狀鈕拂然入逼索愈急闔邑知孽由令作益惶惶無

措呼吸閔民數千至縣庭哀鳴痛哭鈕不為動旋索械召兵
一時奔逸爭門蹂踐死者五十人撫按聞變方擬繕疏鈕
譖于鳳以撓稅馳疏先入緹騎立至應鴻聞逮焚香告祖青
衫皂帽與三孝廉受械而行見者皆哭抵京就訊應鴻抗辯
不屈俱下詔獄時政府部科鳴冤之牘屢上留中不報應鴻
竟卒獄中後應鴻子舉人思友詣闕陳情太常郭尙賓侍御
吳其貴相繼請神宗悔悟詔贈應鴻尙寶寺卿同事舉人梁
斗輝等皆准覆試就選據新會志修
湯敬升字小槐河村人初名懋德少從邑博蕭端升講學東
亭及端升去改今名學宗江門兼以主敬存誠為務事母至
孝兄弟嘗相讓產中萬曆十九年辛卯舉人署星子教諭主
白鹿洞書院立洞規學約教諸生務敦實行來學日眾歲割

俸錢市布以衣寒士署安義令邑故刁頑以德化之幾至無
訟卒于官不能具棺殮諸生共治其喪督學姜養冲檄郡守
以洞租贖之乃得歸葬據新會志修

梁斗輝字忠旋花橋亭人父大積邑弟子員以學行稱斗輝
領萬曆二十五年丁酉鄉薦以權監之難羈管北寺在獄五
年與湖廣僉憲馮應京荆州司李華鈺襄陽司李何棟如四
十餘人講學不倦所著有經世實用黃河議薦辟人物考馬
政書任官考十三經釋註疏萬曆四十二年以水災修省用
閣臣沈一貫諫垣梁有年等議詔赦斗輝及同邑同科舉人
勞養魁鍾聲朝削籍歸里應京聞之曰聖學南矣斗輝歸授
徒大雲寺問業者數百人詔赴禮闈以禫服未除不就道天
啟二年任湖廣通城教諭擢國子學正大司成李孫宸雅重

之遷太平同知剔奸蠹逐優倡禁遊賭闔郡肅然至于折獄
詳刑稱鐵面江防云署繁昌合修啟聖宮敬一亭太平繁昌
俱建生祠以事去官居林下二十餘年絕跡公門撰述聖學

正宗諸書二十餘卷卒年九十

據金通志修

李茂蓉字蓮叔盤溪里人父本真嘗拾遺金五十錠還其人
年九十有一茂蓉生而凝重萬曆二十五年丁酉舉人二十
九年辛丑會試副榜知陽朔縣革火耗緩催科輕徭役設土
塾于堂下常令父老人坐問其疾苦邑苦旱為築長堤蓄洩
以資灌溉遷辰州府同知丁內艱歸起補徽州府同知兩攝
休甯縣篆嘗修汶溪石橋白嶽山路至今稱李公路建李公
亭焉尋署府篆大監同工部呂某至府壓買吳仰春沒產刑
及寡婦郡人洶洶變作大監走府署茂蓉論之立解其得民

如此徽人為立生祠遷兩淮運同晉鹽運使致仕

據新會志修

余士光字元闇邑城人七歲而孤嘗問母以父所在母給曰
勤讀書見汝父矣即啣唔不輟萬曆二十八年庚子鄉薦時
母已沒拜遺像輒涕泣選新興教諭課諸生甚勤形家言學
宮水直而駛不利文士乃捐俸建塔洲前是科獲售者二人
擢廣西臨桂令臨桂省會要衝政務繁劇士光隨事綜理務
無叢脞時桂王宗人多凌鑠小民士光執法無所縱歲飢出
積倉賑救全活甚眾陞劍州知州辭疾不赴歸橐蕭然惟杜
門課兒孫力學嘗三與賓筵年七十九卒

據新會志修

趙應元字葆初北到人居父喪泣血三年事母阮色養愈至
登萬曆二十三年乙未進士令無錫初過惠泉酌水自誓抵
任延訪父老知賦役不均因履畝核肥瘠高下多寡盡剔欺

隱飛灑諸弊罷夫里在官者民感泣期會卽集聽民訟各使盡言折以片語至御豪閭市魁則執法不可犯廣布耳目每盜發知窟穴一搜卽得盜驚以爲神徙避他邑常出公美通九箭河新齋舍置學田搜殘碑斷碣勒金石使流風不泯邑號煩劇處之有餘暇焉稅事起璫涎無錫富庶檄爲關權所應元拒之璫擁眾至矯言已得請因懸黃旗赤羽白晝攫往來金行旅洶洶聯百艘揮白梃相擊禦呼吸間且變起應元列狀陳不便數十事爲民請命當道馳疏奏罷報可當是時非應元百姓室無甯宇擢虞部主事士民挽留遮道不得行祀之于芙蓉里卽與璫爭權會地也尋晉虞部郎理大工有綜幹聲奉使易州絕餽遺取道歸省母宗族貧者葬代榷婚代禽讀代雉內外翕然亡何卒

據新會志修

黃貞字邑芳黃浦人祖國賦名田以字行嘉靖二年大征布政章拯參政葛浩聞賦行義具禮召之賦不獲辭遂散財起義擒賊五十餘徒長沙二鄉皆良民也官欲并剿賦力爭保全三百餘家委招撫餘賊賦負固不服賦以大義斥之遂遇害章葛二公指揮程鑑齋帛弔之旌曰義士復其家貞七歲失怙事母孝母患瘡旦夕舐瘡得愈爲藩吏會瓊州遞數辟囚至拷掠無完膚食絕幾死曰此囚例不應辟若必以貧誤也各給粟引例白之藩主疑且怒隨察囚果病始直貞言改免辟嘗拾潘祥魚課金候其至還之撫兄遺孤視諸從弟若同胞築綠芷堂蒔花竹日遊咏其間萬曆三十四年年八十一盜劫以去一夜三徙度不可脫夜忽夢長髯神示詩一聯及覺而諸盜斲睡遂援厓出遇二善人翼之獲歸人以爲善

行之報據新會志修

倫肇修字得昌號五知沙頭人父大禮祀鄉賢肇修長身玉
立志趣超邁萬曆三十五年丁未成進士授武學教授遷國
子監助教陞戶部主事丁艱起補吏部文選司主事晉驗封
員外考功郎中大璫魏忠賢方竊柄不屑與周旋請假歸省
推湖廣四川參政皆不拜改尚寶卿光祿少卿遷大理寺少
卿以事抗魏璫削籍南歸莊烈帝登極起用逐臣補原任在
廷侃侃嶽立論斷明允丁外艱起晉大理寺正卿未任卒里
居時有庠生鍾巨器儒士湯起武平民趙長為仇所誣幾陷
大辟肇修亟為申雪脫諸獄口不言德嘗設義倉以備飢置
義塚以掩骼云據新會志修
潘起鵬字以凌號扶翼邑城人萬曆三十七年己酉舉人天

啟七年知象山縣釐剔姦弊吏胥畏若神明值海寇攻昌石
諸城起鵬率兵剿禦獲賊曾伯仁等海疆胥靖遷南康推官
未至左轉大庾晉鬱林知州著象山防寇事宜二十五條據新會志修

余士琮字子旦河塘湯村人幼以孝稱萬曆四十年王子與
從兄同舉鄉薦崇禎四年司教程鄉陞南京國子助教首拔
顧其言成名進士十年擢南京刑部司務尚書甄淑天性端
毅僚屬莫敢抗琮讞疑獄平反再三不少徇甄壽顏從之入
為北京戶部主事尋轉員外郎當都城戒嚴持籌猝辦出為
雲南僉事備兵金騰累陞太僕寺丞光祿少卿卒年八十一
子滋慧順治十四年丁酉賢書選授江甯知縣讞獄明決催
科不收耗羨有廉能稱以事停陞致仕歸據新會志修

林聯綬字澹生沙岡人少嗜學登萬曆四十一年癸丑進士初授秀水知縣諸所徵調務樽節以寬民凋瘵流亡聞風復業釐剔虛糧逋累者三千家申請題豁擢刑部主事遷員外郎恤刑粵西革供具慮囚平反一百四十人上悉報可擢延平知府尋以憂去起補汀州府益持大體不以鈎距為能民安其政會江右寇警顧撫羽檄徵援兵聯綬捐俸召募甲械糧糗咄嗟而辦未幾解組歸悠然自樂不預門外事士論賢之據新會志修

易奇際字開伍坡亭人性孝有文行年十二侍母馮氏疾廢寢食者累月及喪哀毀骨立弱冠為郡諸生舉崇禎二年己巳鄉薦公車凡三上與豪俊交遊以忠孝大節自期十二年赴都上書論邊防諸務時禮部試事未畢忽夢父疾亟遽束

裝歸抵家父卒已逾月人謂精誠所感云服闋絕意公車講

學授徒以克己為要主靜為宗為文高邁卓越卒年六十三

門人私諡曰文哲季子訓少能詩性狷介常住匡山倚哀歌

亭放聲大哭人莫之測也得瘴疾卒年二十六據新會志修

陳璣字禮璇潮連人天啟四年甲子舉人崇禎七年授福建

順昌知縣善讞獄脫無辜五人于大辟抵土豪罪豪紳誣富

民貸千金璣察其偽取券焚之時值亢旱捐俸賑濟復會酌

平糶活數萬家以艱回籍服畢講學清白堂門徒千人嘗負

宿債為人訟于縣縣令劉象震重之為捐俸金百代償卒年

八十三據新會志修

唐元楫字應運白石人淹貫經史根極理要舉天啟四年甲

子舉人崇禎十六年癸未成進士授兵部職方司主事給假

南還值鼎革部院佟養甲檄署梧州司李不就順治中巡按疏薦起用亦不起卒年七十有八學者私諡文貞

據新會志修

林枝橋字陽仲涪頭人性貞介事父母孝好學以古文詞見稱登萬曆二十七年己酉鄉薦四十四年丙辰進士授當塗令政尚寬簡守法不苛嘗懲一郡吏太守降手札為解卒置諸法圩田數十年患水築堤植榆民賴其功蜚蝗為災躬自禱神捐俸米置斛田中募民捕蝗計所捕斗斛受賞蝗以息遷禮部主事歷吏部郎中清操自厲銓綜平允起董其昌謝陞李逢節等皆一時正人時魏璫擅權受譚某金謀奪新甯侯爵橋堅執不從其黨御史倪文煥以江北分司官請不許文煥疏參東林渠魁尙伏天啟五年七月忠賢矯詔橋及李邦華周宗建周順昌李日宣等同日奪職既歸與生徒講學

于社學書院者八載崇禎元年璫敗詔復原官五年遷湖廣參議轉福建副使以忤直指左考去官繼起貴州參政遷按察使所至得吏民心丁繼母憂歸壬午夏六月卒所著有白鶴山房集行世子堯徽字啟人崇正改元恩貢孝友嚴正初為諸生首事攻豪猾蔣某以凌辱其友諸生趙故豪餽金及刺客蠱毒徽志不渝時邑勢家橫者多籍縣官丞尉刑禁人于城樓以得所欲邑令卞應聘訪徽燕邸徽力陳其害且言防盜禁奸拒佞清蠹五事卞力行之夙弊頓革與弟太學生堯揆友愛出必雁行性好學老而不倦所纂述盈數麓隱居不仕自號天紳居士

據金通志修

梁應材字瑤石天等村人萬曆四十年壬子鄉薦天啟二年壬戌進士初授進賢令為豫章劇邑應材御之以寬而政無

廣州府志卷之二十一
不理以艱去起補蕪湖新學宮疏泮源繕隄堰申保甲于是
文物蔚興奸宄消息兩攝關象陋規盡革以治行擢駕部主
事遷吏部文選司益清慎自矢峻絕賂遺及歸杜門不出鼎
革後隱居陽春山中足跡不入城市與田夫野老雜處絕口
不言朝事誠家人不得稱故號但呼阿翁而已壽七十六卒

據阮通志修

劉大啟字君昌邑城人天性孝友嗜學能文年十九舉天啟
元年辛酉鄉書二十年教授生徒執經問業者常數百人崇
正十二年己卯胞弟大光得售兄弟北上時稱二劉大啟即
于十三年庚辰成進士授浙江嘉善知縣旱蝗洊虐大啟哀
籲于天厲風夜作闔邑飛蝗撲滅殆盡是歲東浙大饑而嘉
善大有年邑人德之其冬癘疫俗用黃符禳辟奸民以詭名

誑太守指為叛謀百姓洶洶懼禍大啟身自詣郡以百口保
之民賴以安一切陋規槩行裁革署平湖撫字勞瘁得疾卒
蒞任纔五月耳年四十三無子沒後囊無一錢錢學士升推
所具棺轉殯之百姓為之罷市五日妻張氏苦節自貞族黨
賢之

據阮通志修

區聯芳字元美邑城人登崇禎四年辛未進士授泉州推官
治獄讞決中情多所平反攝同安洋貨所集歲有陋規數千
金峻却之因公至漳州延平建甯餼糧自隨絕一切餽遺供
帳性剛訥延平有土豪坐贓諸紳士力求出之芳但曰照理
無敢干以私者時稱為區照理十五年擢御史巡按直隸宣
大山西兼攝學政溫陵人懷之為建祠紫雲寺西儀部尚書
黃汝良為之記在溫陵時邑有給練子李某怙勢不避道聯

芳叱吏卒收之時直指使爲李同譜李亡走直指所直指謂
芳曰伊父爲給諫不能庇一子乎芳曰職聞朝廷法不聞給
諫子拘之益力其剛執類如此既歸矩矱自持嘖笑不苟邑
人欽之後祀泉州名宦據新會志修

容報國字君寵新村人務學多藝能崇禎間以掾吏任錦州
倉大使錦屯重兵倉庫場局官吏盡逃報國以一人兼攝之
會計詳明州事倚以爲重諸倉歲羨悉歸公帑將軍祖大壽
薦授州判尋以餽運不繼催科至松山間

國朝兵將趨錦州松山尹石某勸之少逡巡候進止報國泣
曰錦兵掘鼠而食數米而炊糧若不入則無州矣可無身不
可無州也遂催糧入城三日被圍糧盡援絕錦州不守報國
具衣冠向闕五拜仰藥死順治初其子如玉舉于鄉始得其

詳于石某禮部主事劉輝爲墓志招魂以葬據新會志修

何士域字文起尚書熊祥家子也由恩貢知湖廣新甯縣新
甯巖邑難治且密邇岷藩多爲所挾士域甫下車會有校尉
大索邑民盜鹿者民重足立士域廉得其情執校尉杖之王
怒遣數使立徵詣府士域正色曰民皆王民也校尉誣民飛
噬爲王彰惡聲于王何賴焉王爲霽威下教禁戢更言新甯
好官折節交驩民得無擾士域益勵節操勤政事百廢具舉
賦課稱最行取赴部考選父訃至奔喪回籍哀毀骨立旋得
疾卒年五十八據新會志修

何士垠字文玉熊祥仲子孝友和藹崇正八年乙亥拔貢歷
官南刑部郎中治獄平允強年解綬優游林下施棺捨藥名
聞鄉邑三經歲禮倡率弟姪炊粥賑飢存活無數寇逆兩犯

邑城偕弟士堦捐餉協守城賴保全士堦由府學厯官大理寺評事邑孝子容瑞子孫中替孫媳節婦伍氏有李村田三十畝鬻之堪焚券還田其行誼多類此年七十二卒據新會志修

新會採藥者不知何許人日採九里明賣以為食其藥多生柑荔圃日暮人採之絕不視柑荔雖自落亦不顧人怪問之

曰自食是盜也圃不容盜人是自絕也日得十錢以其半入

酒肆醉即行歌歌曰人道春花春日好花開能得幾朝紅一

日道上拾金釧珠珥大笑置藥籃中歌曰寶寶寶得好失好

失好得好人莫測其意會一女子哭失物趨問曰何物語合

即籃出還之主者餽以金搖首而歌曰不受不受真不受還

金籃香得金臭悠然而逝後歲飢入山不知所終據阮通志修

新會負汲者不知何許人日肩井中水賣自度得數錢即擺

手入歌于道取火必寺觀絕不干人縣中人或呼之引至護

樓外仰視曰我平生不入此翻手傾壘而去一日道上拾遺

金默坐其處人問之不答既而失金者至曰金在旁人教使

言金合數方得還言合即大笑還之且歌且走不顧據阮通志修

黃公輔字振璽杜阮村人成化進士印之元孫萬厯四十年

壬子鄉薦四十四年丙辰進士知福州浦城縣薄歛省刑民

甚德之晉南京山西道御史有府屬誤于文網力為昭雪餽

以醢發之金也還其金而切責之劾權璫魏忠賢李實言甚

激切留中不報削奪回籍璫敗起湖廣參議分巡湖北轉江

西副使湖民數百抵京擁政府楊嗣昌門責其不為桑梓保

障計楊懼特疏題留還公輔于楚晉叅政分守寶慶因入賀

上疏言流賊猖獗征討宜急等事上嘉納賜宴優渥越二年

兼備兵鎮長沙值賊犯城公輔設伏擒斬三千餘未幾復回
寶慶臨藍賊萬餘逼城督兵逆擊搗其巢擒賊首斬之餘黨
悉平上功加俸二級廕一子尋會推都御史撫治偏沅以病
辭歸癸未起太僕卿轉南左通政刑部侍郎晉兵部尚書皆
不拜鼎革後避地新甯卒年八十有四

據新會志修

區志遠字爾遂潮連石版里人年二十餘不學里眾姍笑之
乃發憤從師受書日不滿三四行伏首以鼻磨席顙汗染卷
自曉至夕不成誦其父饒有貲欲令稍習書能知牛粟出入
之數以得不棄去久之其弟舉于鄉志遠讀其文曰直若是
非難到也師叱曰汝何得大言志遠請自試應筆立就皆可
觀師以示其父伯叔兄弟更相謂為先生不患無所何至代
人子弟欺父兄耶師具語其實乃共奇之萬曆四十六年戊

午遂舉于鄉初授澄海教諭陞南武學教授兼國子監助教
崇禎末為都察院都事都下大疫環志遠所居無存者而志
遠家晏然于是都下頗傳區都事能治疫鬼有得其花押者
持至門則室內病人立起家家走求區都事之門熱于要津
矣某御史病甚過志遠志遠曰入吾榻內卧有頃當瘳也其
人少睡得汗病良已志遠以此有德于大僚得擢南兵部主
事歷員外郎中乙酉大兵渡江南都潰士夫多降者志遠獨
挈妻子扁舟南奔道為亂兵所掠備極艱苦始達江右時嶺
外阻絕因遜入清江深山擁茅以蔽惟祝大詹暨鄒黃諸故
老知其蹤跡嘗密過訪相顧流涕居不旬日遂發病口占一
絕曰朝廷養我今何補恐愧昂藏一丈夫大厦將傾支不得
孤臣萬死有餘辜遂卒妻顧氏同時自縊二子削髮為僧諸

故老為殯之淺土後康熙五年族孫孟賢赴春官試邂逅清江孝廉黃偕宸始悉其詳志遠子伯亮為僧老矣乃同啟土

扶之歸葬據新會志修

鍾鼎臣字彝公浙江通志誤作東莞沙頭人年十三補諸生王宏誨甚

器之禮為館甥鼎臣謝不往崇正六年癸酉由南海學領鄉

薦七年甲戌成進士授甯國府推官尋改河南散官轉部郎

擢真定知府改知嘉興大兵至與紳士沈輝辰等誓師死守

授甲登陴以御史陸清源等為聲援月既望兵艦環集戰南

關清源師潰孤城不支自經死時年六十有二

國朝賜諡節愍據新會志勝朝殉節諸臣錄修

王興字電輝居海上文村明史陳子壯傳作新會王興成仁錄陳邦彥傳作恩平王興俟考

為明守我師攻圍之年餘不能下糧盡闔室自焚我師義之

葬于河南簸箕村為題其墓碣曰明賁虎將軍晉封縣伯電

輝王公偕同節原配張氏一品夫人暨十五庶夫人之墓據番

馬志修以上新會

謹案新甯志載王興事頗詳文村為新甯地興攻據

之則新會人信也故附于此

南海李徵爵分纂

南海梁

起初校


番禺金佑基再校

番禺史悠泰三校

順德羅

槩四校

廣州府志卷一百二十六終



廣州府志
卷一百一十二

